

四庫全書薈要·乾隆御覽本

集部

欽定四庫全書薈要

集部
樊川集卷八至
十

詳校官助教臣常倫



樊川集卷八

唐 杜牧 撰


李賀集序

太和五年十月中半夜時舍外有疾呼傳緘書者牧曰
必有異亟取火來及發之果集賢學士沈公子明書一
通曰吾亡友李賀元和中義愛甚厚日夕相與起居飲

食賀且死嘗授我平生所著歌詩雜為四編凡若干首
數年來東西南北良為已失去今夕醉解不復得寐即
閱理篋帙忽得賀詩前所授我者思維往事凡與賀話
言嬉遊一處所一物候一日夕一觴一飯顯顯焉無有
忘棄者不覺出涕賀復無家室子弟得以給養卹問常
恨想其人詠其言止矣子厚於我與我為賀集序盡道
其所來由亦少解我意牧其夕不果以書道不可明日
就公謝且曰世謂賀才絕出前讓居數日牧深惟公曰

公於詩為深妙奇博且復盡知賀之得失短長今實叙
賀不讓必不能當君意如何復就謝極道所不敢叙賀
公曰子固若是是當慢我牧因不敢辭勉為賀叙然其
甚慙皇諸孫賀字長吉元和中韓吏部亦頗道其歌詩
雲烟絲聯不足為其態也水之迢迢不足為其情也春
之盎盎不足為其和也秋之明潔不足為其格也風播
陣馬不足為其勇也瓦棺篆鳥不足為其古也時花美
女不足為其色也荒國侈殿梗莽丘壘不足為其恨怨

悲愁也鯨吐鰲擲牛鬼蛇神不足為其虛荒誕幻也蓋
騷之苗裔理雖不及辭或過之騷有感怨刺懟言及君臣
理亂時有以激發人意乃賀所為無得有是賀能採尋
前事所以深嘆恨今古未嘗經道者如金銅仙人辭漢
歌補梁庾肩吾宮體謠求取情狀離絕遠去筆墨畦逕
間亦殊不能知之賀生二十七年死矣世皆曰使賀且
未死少加以理奴僕命騷可也賀死後凡五十年京兆
杜牧為其序

注孫子序

兵者刑也刑者政事也為夫子之徒實仲由冉有之事也今者據案聽訟械繫罪人笞死於市者吏之所為也驅兵數萬極其城郭係累其妻子斬其罪人亦吏之所為也木索兵刃無異意也笞之與斬無異刑也小而易制用力少者木索笞也大而難制用力多者兵刃斬也俱期於除去惡民安活善人為國家者使教化通流無敢輒有不由我而自恣者其取吏無他術也無異道也

俱止於仁義忠信智勇嚴明也苟得其道一二者可以使之為小吏盡得其道者可以使之為大吏故用力少者其吏易得也功易見也用力多者其吏難得也功難就也止此而已無他術也無異道也自三代已降皆由斯也子貢頌夫子之德曰文武之道未墜於地在人賢者識其大者遠者不賢者識其小者近者季孫問冉有曰子於戰學之乎性達之也對曰學之季孫曰事孔子惡乎學冉有曰即學之於孔子孔子者大聖兼該文武

並用適聞其戰法猶未之詳也復不知自何代何人分
為二道曰文曰武離而俱行因使縉紳之士不敢言兵
既耻言之苟有言者世以為僇暴異人人不比數嗚呼
亾失根本斯最為甚周公相成王制禮作樂尊大儒術
有淮夷叛則出征之夫子相魯公會於夾谷曰有文事
者必有武備叱辱齊侯伏不敢動是二大聖人豈不知
兵乎周有齊太公秦有王翦兩漢有韓信趙克國耿弇
虞詡段熲魏有司馬懿吳有周瑜蜀有諸葛武侯晉有

羊祜杜公元凱梁有韋叡元魏有崔浩周有韋孝寬隋
有楊素國朝李勣裴行儉郭元振如此人者當其一
時其所出計畫皆考古校今竒秘長遠策先定于內
功後成于外彼壯健輕死善擊刺者供其呼召指使耳
豈可知其所由來哉牧幼讀禮至於四郊多壘卿大夫
辱也謂其書真不虛說年十六時見盜起圍二千里
係戮將相族誅刺史及其官屬屍塞城郭山東崩壞殷
殷焉聲振朝廷當其時使將兵行誅者則必壯健善擊

刺者卿大夫行列進退一如常時笑歌嬉遊輒不為辱
非當辱不辱以為山東亂事非我輩所宜當知牧自此
謂幼所讀禮真妄人之言不足取信不足為教及年二
十始讀尚書毛詩左傳國語十三代史書見其樹立其
國滅亡其國未始不由兵也主兵者聖賢材能多聞博
識之士則必樹立其國也壯健擊刺不學之徒則必敗
亡其國也然後信知為國家者兵最為大非賢卿大夫
不可堪任其事苟有敗滅真卿大夫之辱信不虛也因

求自古以兵著書列於後世可以教於後生者凡十數家且百萬言其孫武所著十三篇自武死後凡千歲將兵者有成者有敗者勘其事跡皆與武所著書一一相抵當而印圈模刻一不差跌武之所論大約用仁義使機權也武所著書凡數十萬言曹魏武帝削其繁剩筆其精切凡十三篇成為一編曹自為序因注解之曰吾讀兵書戰策多矣孫武深矣然其所為注解十不釋一此者益非曹不能盡注解也予尋魏志見曹自作兵書

十餘萬言諸將征伐以新書從事從令者克捷違教者
負敗意曹自於新書中馳驟其說自成一家事業不欲
隨孫武後盡解其書不然者曹豈不能耶今新書已亡
不可復知予因取孫武書備其注曹之所注亦盡存之
分為上中下三卷後之人有讀武書予解者因而學之
猶盤中走丸丸之走盤橫斜圓直計於臨時不可盡知
其必可知者是知丸不能出於盤也議於廊廟之上兵
形已成然後付之於將漢祖言指蹤者人也獲兔者犬

也此其事也彼為相者曰兵非吾事吾不當知君子曰
叨居其位可也

送薛處士序

處士之名何哉潛山隱市皆處士也在山也且非頑如
木石也在市也亦非愚如市人也蓋有大智不得大用
故羞耻不出寧反與市人木石為伍也國有大智之人
不能大用是國病也故處士之名自負也諷國也非大
君子孰能當之薛君之處蓋自負也果能窺測堯舜孔

子之道使指制有方弛張不窮則上之命一日來子之
廬子之身一日立上之朝使我輩居則來問學仕則來
問政千辯萬索滔滔而得若如此則善苟未至是遽名
曰處士雖吾子自負其不為矯歟敢用此贈行

送廬秀才赴舉序

治心治身治友三者治矣有求名而名不隨者未之聞
也治心莫若和平治身莫若兢謹治友莫若誠信友治
矣非身治而不能得之身治矣非心治而不能致之三

者治矣推而廣之可以治天下惡其求成進士名者而
不得也况有千人皆以聖人為師眠而食一無其他唯
議論是司三人有私十人公私半百人無有不公者况
千人哉古之聖賢業大事鉅道行則不肖懼道不行則
不肖喜故有不公今進士者業微事細如成其名不肖
未所喜懼寧不公耶故取之甚易耳盧生客居於饒年
十七八即主一家骨肉之饑寒常與一僕東泛滄海北
至單于府丐得百錢尺帛囊而聚之使其僕負之以歸

饒之士皆憐之能辭明敏而知所去就年未三十嘗三
舉進士以業丐資家近中輟之去歲九月余自池改睦
凡同舟三千里復為留睦七十日今之去余知其成名
而不復丐矣

杭州新造南亭子記

佛著經曰生人既死陰府收其精神校平生行事罪福
之坐罪者刑獄皆怪險非人世所為凡人平生一失舉
止皆落其間其尤怪者獄廣大千百萬億里積火燒之

一日凡千萬生死窮億萬世無有間斷名為無間夾殿
宏廓悉圖其狀人未熟見者莫不毛立神駭佛經曰我
國有阿闍世王殺父王篡其位法當入所謂獄無間者
昔能求事佛後生為天人況其他罪事佛固無恙梁武
帝明智勇武創為梁國者捨身為僧奴至國滅餓死不
聞悟况下輩固惑之為工商者雜良以苦偽內華外納
已大秤斛以小出之欺奪村閭慙民銖積粒聚以致於
富刑法錢穀小胥出入人性命顛倒埋沒使簿書條令

不可究知得財買大第豪奴如公侯家大吏有權力能
開庫取公錢緣意恣為人不敢言是此數者心自知其
罪皆捐已奉佛以求救月日積久曰我罪如是富貴如
所求是佛能滅吾罪復能以福與吾也有罪罪滅無福
福至生人惟罪福耳雖田婦稚子知所趨避今權歸於
佛買福賣罪如持左契交手相付至有窮民啼一稚子
無以與哺得百錢必召一僧飯之冀佛之助一日獲福
若如此雖舉寰海內盡為寺與僧不足怪也屋壁繡紋

可矣為金枝扶疎擎千萬佛僧為具味飯之可矣飯訖持錢與之不大不壯不高不多不珍竒瓌怪為憂無有人力可及而不為者晉霸主也一銅鞮宮之衰弱諸侯不肯來盟今天下能如幾晉凡幾千銅鞮人得不困哉文宗皇帝嘗語宰相曰古者三人共食一農人今加兵佛一農人乃為五人所食其聞吾民尤困於佛帝念其本牢根大不能果去之武宗皇帝始即位獨奮怒曰窮吾天下佛也始去其山臺野邑四萬所冠其徒幾至十

萬人後至會昌五年始命西京留佛寺四僧唯十人東
京二寺天下所謂節度觀察三十四治所得留一寺僧
准西京數其他刺史州不得有寺出四御史縷行天下
以督之御史乘驛未出關天下寺至於屋基耕而刈之
凡除寺四千六百僧尼并冠二十六萬五百其奴婢十
五萬良人枝附為使令者倍并冠之數良田數千萬頃
奴婢口率與百畝編入農籍其餘賤取民值歸於有司
寺材州縣得以恣新其公署傳舍今天子即位詔曰佛

尚不殺而仁且來中國久亦可助以為治天下州率與
二寺用齒衰男女為其徒各止三十人兩京數倍其四
五焉著為定令以徇其習且使後世不得復加也趙郡
李子烈播立朝名人也自尚書比部郎中出為錢塘錢
塘於江南繁大雅亞吳郡子烈少遊其地委曲知其俗
蠹人者剔削根節斷其脈絡不數月人隨化之三牋干
丞相云濤壞人居不一鐸錮敗侵不休詔與錢三千萬
築長堤少為數十年計人益安喜子烈曰吳越古今多

文士來吾郡遊登樓倚軒莫不飄然而增思吾郡之江山甲於天下信然也佛熾害中國六百歲生見聖人一揮而幾夷之今不取其寺材立亭勝地以彰聖人之功使文士歌詩之後必有指吾而罵者乃作南亭在城東南隅宏大煥顯工施手目髮勻肉均牙滑而無遺巧矣江平入天越峰如髻越樹如髮孤帆白鳥點盡上凝在半夜酒餘倚老松坐怪石殷殷潮聲起於月外東閩西越宦遊善地也天下名士多往之予知百數十年後登

南亭者念仁聖天子之神功矣美子烈之旨跡睹南亭
千萬狀吟不能已四時千萬狀吟不能去作為歌詩次
之於後不知幾千百人矣

池州造刻漏記

百刻短長取於日不取於數天下多是也牧太和三年
佐沈吏部江西府暇日公與賓吏環城見銅壺銀箭律
如古法曰建中時嗣曹王臯命處士王易簡為之公曰
湖南府亦曹王命處士所為也後二年公移鎮宣城王

處士尚存因命工就京師授其術創置於城府牧為童
時王處士年七十嘗來牧家精大演數與雍機巧識地
有泉鑿必湧起韓文公多與之遊太和四年牧自宣城
使於京師處士年餘九十精神不衰牧拜於牀下言及
刻漏因圖授之會昌五年歲次乙丑夏四月某日始造
於城南門樓京兆杜牧記

池州重起蕭丞相樓記

蕭丞相為刺史時樹樓於大廳西北隅上藏九經書下

為刺史使事廳大曆十年乙卯建會昌四年甲子榷木
悉朽壞無一可取者刺史李方玄具材刺史杜牧命工
南北雷相距五十六尺東西四十五尺十六柱三百七
十六椽上下凡十二間上有其三焉皆仍舊制以會昌
五年五月畢自初至再凡七十一年丞相諱復實相德
宗皇帝焉京兆杜牧記

同州澄城縣戶部工食尉廳壁記

縣之所重其舉秀貢賢也今日自外諸侯之儒者曠不

能升一人況尉乎次乃戶稅而已史記河渠書曰自徵

引洛水至商顏下

商顏山名

鑿井深者四十餘丈即此地也

徵者俗訛為澄耳其地西北山環之縣境籠其趾沙石相礪歲雨如注他皆淫灑不測徵之土適潤苗則大穫天或旬而不雨民則蒿然四望失矣是以年多薄稔復絕絲麻藍菓之饒固無豪族富室大抵民戶高下相差埒然歲入官賦未嘗期表鞭一人因徵其來由耆老咸曰西四十里即畿郊也至如禁司東西軍禽坊龍廡彩

工梓匠善聲巧手之徒第番上下互來進取挾公為首
緣以一括十民之晨炊夜舂歲時不敢嘗悉以仰奉父
伏子走尚不能當其意往往擊辱而去長吏固不敢援
復况其養秩安祿者耶加以御女官多盤穴其間遞相
占附比急熱如手足自丞相御史咸不能與之角逐縣
令固無有為也非豪吏真工聯紐相姻戚者率解去是
以縣賦益逋徵民幸脫此苦者蓋以西有通澗巨壑又
牙交吞小山峭逕馳鞍馬張機置者不便於此是以絕

跡不到蕪之土田枯鹵樹植不茂無秀潤氣象咸惡之而不家焉民所以安活輸賦者殆由此倘使徵亦中其苦則墟矣尚安敢比之於他邑乎嗟乎國家設法禁百官持而行之有尺寸害民者率有尺寸之刑今此咸墮地不起反使民以山之澗壑自為防限可不悲哉使民恃險而不恃法則劃土者宜乎牆山塹河而自守矣燕趙之盜復何可多怪乎書其西壁俟得言者覽焉

宋州寧陵縣記

建中初年李希烈自蔡陷汴驅兵東下將收江淮寧陵
守將劉昌以兵二千拒之希烈衆且十倍攻之三月韓
晉公以三千強弩涉水夜入寧陵弩矢至希烈前希烈
曰復益吳弩寧陵不可取也解圍歸汴後數月希烈驍
將翟輝以銳兵大敗於淮陽城下希烈且蹙棄汴歸蔡
後司徒劉公玄佐見昌問曰爾以孤城用一當十凡百
日間何以能守昌泣曰以不負心能守之耳昌令裨者
曰內顧者斬昌孤甥張俊守西北隅未嘗內顧梓下斬

之軍士有死志故能堅守因伏地流涕司徒劉公亦泣

撫昌背曰國家必以富貴爾天寶末淮陽太守薛愿即

起居郎睢陽太守許遠真源縣令張巡等兵守二城其

於窮蹙事相差埒睢陽陷賊淮陽能守故巡遠名懸而

愿事不傳昌之守寧陵近比之於淮陽故良臣之名不

如忠臣孫武曰善用兵者無赫赫之功斯是也時大中

二年十一月十八日

淮南監軍使院廳壁記

淮南軍西蔽蔡壁壽春有團練使北蔽齊壁山陽有團練使節度使為軍三萬五千人居中統制二處一千里三十八城護天下餉道為諸道府軍事最重然倚海塹江淮深津橫岡備守堅險自艱難以來未嘗受兵故命節度使皆以道德儒學來罷宰相去登宰相命監軍使皆以賢良勤勞內外有功來自禁軍中尉樞密使去為禁軍中尉樞密使自貞元元和已來大抵多如此今上即位六年命內侍宋公出監淮南諸開府將軍皆以內

侍賢良有材不宜使居外上以為內侍自元和以來誅
齊誅蔡再伐趙前年誅滄旁擊趙魏且徵師且撫師且
告且諭勤勞危險終日馬上往監青州新附卧未嘗安
復監滑州邊魏窮狹多事今監淮南是且休之休息亦
不久之故內侍至焉監軍四年如始至日簡約寬表明
白清潔恕悉軍吏禮愛賓客舉止作動無非典故暇日
唯召儒生講書道士治藥而已內侍舊部將校多禁兵
子弟京師少俠出入閭里間俛首唯唯受吏約束故上

至相國竒章公下至於百姓無不道說內侍稱為賢人
此不虛也宜其侍衛六朝聲光富貴牧謬為相國竒章
公幕府掌書記奉內侍命為廳壁記牧再謝不才不足
記序內侍曰掌書記為監軍使廳壁記宜也牧慙惶而
書

樊川集卷八

樊川集卷九

唐 杜牧 撰

書

上司徒李相公論用兵書

伏觀明詔誅山東不受命者廟堂之上事在相公雖樽俎之謀算畫已定而賤末之士芻蕘敢陳伏希赦其狂愚一賜聽覽牧太和二年為校書郎曾詣淮西將軍董

重質詰其以三州之衆四歲不破之由重質自誇勇敢
多算之外復言其不破之由是徵兵大雜耳徧徵諸道
兵士上不過五千人下不至千人既不能自成一軍事
須帖附地主名為客軍每有戰陣客軍居前主人在後
勢羸力弱心志不一既居前列多致敗亡如戰似勝則
主人引救以為已功小不勝主人先退至有殲焉初戰
二年已來戰則必勝是多殺客軍及二年已後客軍殫
少止與陳許河陽全軍相搏縱使唐州軍不能因雪取

城蔡州事力亦不能支矣其時朝廷若使鄂州壽州唐
州祇令保境不用進戰但用陳許鄭滑兩道全軍帖以
宣潤弩手令其守隘即不出一歲無蔡州矣今者上黨
之叛復與淮西不同淮西為寇僅五十歲破汴州襄州
襄城盡得其財貨輸之懸瓠復敗韓全義於潞上多殺
官軍四萬餘人輸輦財穀數月不盡是以其人味為寇
之腴見為寇之利風俗益固氣焰已成自以為天下之
兵莫我與敵父子相勉僅於兩世根深源濶取之固難

夫上黨則不然自安史南下不甚附隸建中之後每奮忠義是以邕公抱真能窘田悅走朱滔常以孤窮寒苦之軍橫折河朔彊梁之衆貞元中節度使李長策卒中使提詔授與本軍大將但軍士附者即授之其時大將來希皓為衆所服中使將以手詔付之希皓言於衆曰此軍取人合是希皓但作節度使不得若朝廷以一束草來希皓亦必敬事中使言面奉進旨祇令此軍取大將授與節鉞朝廷不別除人希皓固辭押衙盧從史其

位居下因潛與監軍相結超出伍曰若來大夫不肯受
詔某請且勾當此軍監軍曰盧中丞若肯如此此亦固
合聖旨中使因探懷取詔以授之從史捧詔再拜舞蹈
希皓回揮同列使北面稱賀軍士畢集更無一言從史
邇後漸畜女姦謀養義兒三千人日夕煦沫及父虔死軍
士留之表請起復亦祇義兒與之唱和其餘大將王翼
元烏重胤第五釗等及長行兵士並不同心及至被擒
烏重胤坐於軍門喻以禍福義兒三千一取約束及河

陽取孟元陽為之統帥一軍無主僅一月日曾無犬吠
况於他謀以此證驗人心忠赤習尚專一可以盡見及
元和十五年授與劉悟時當幽鎮入覲天下無事柄廟
算者議必銷兵雄健敢勇之士百戰千攻之勞坐食租
賦其來已久一旦黜去使同編戶紛紛諸鎮停解至多
是以天下兵士聞之無不忿恨至長慶元年七月幽鎮
乘此首唱為亂昭義一軍初亦鬱咈及詔下誅叛使温
起居造宣慰澤潞便令發兵其時九月天氣已寒四方

全師未頌冬服聚之受詔或伍或離垂手強項往往諄
語及溫起居立於重榻大布恩旨并疏昭義一軍自七
十餘年忠義戰伐之功勞安史已還叛逆滅亡之明效
辭語既畢無不懽呼人衣短褐爭出效命其時用兵處
處敗北唯昭義一軍於臨城縣北同果堡下大戰殺賊
五千餘人所殺皆樓下步射搏天飛者賊之精勇無不
殲焉賊中大震更一月日田布不死賊亦自潰後一月
其軍大亂殺大將慈州刺史張汶因劫監軍劉承階盡

殺其下小使此實承階侮媒一軍侵取不已張汶隨王承元出於鎮州久與昭義相攻軍人惡之汶既因依承階謀欲殺悟自取軍人忌怒遂至大亂非悟獨能使其如此劉悟卒從諫求繼與扶同者祇鄆州隨來中軍二千耳其副倅賈直言入責從諫曰爾父提十二州地歸之朝廷其功非細祇以張汶之故自謂不潔淋頭竟至羞死爾一孺子安敢如此從諫恐悚不敢出言一軍聞之皆陰然直言之說值寶厯多故因以授之今纔二十

餘歲風俗未改故老尚存雖欲劫之必不用命伏以河

陽西北去天井關強一百里

關屬澤州

關隘多山井泉可鑿

雖有兵力必恐無功若以萬人為壘下窒其口高壁深
塹勿與之戰忽有敗負勢驚洛師蓋河陽軍士素非精
勇戰則不足守則有餘成德一軍自六十年來世與昭
義為敵訪聞無事之日村落鄰里不相往來今王司徒
代居反側思一白雪況聯姻戚願奮可知六十年相讎
之兵仗朝廷委任之重必宜盡節以答殊私魏博承風

亦當効順然亦止於圍一城攻一堡刊木堙井係累稚老而已必不能背二十城長驅上山徑擣上黨其用武之地必取之策在於西面今者嚴紫塞之守備謹白馬之隄防祇以忠武武寧兩軍以青州五千精甲宣潤三十弩手由絳州路直東徑入不過數月必覆其巢何者昭義軍糧盡在山東澤潞兩州全居山內土瘠地狹積穀全無是以節度使多在邢州名為就糧山東糧穀既不可輸山西兵士亦必單鮮擣虛之地正在於此後周

武帝大舉伐齊路由河陽吏部宇文弼曰夫河陽要衝
精兵所聚盡力攻圍恐難得志如臣所見彼汾之曲戍
小山平用武之地莫過於此武帝不納無功而還後復
大舉竟用弼計遂以滅齊前秦苻堅遣將王猛伐後燕
慕容暉大破暉將慕容評於潞州因遂滅之路亦由此
北齊高歡再攻後周路亦由此而後周名將韋孝寬齊
王攸常鎮勳州玉壁城

今絳州稷
山縣是也

故東西相伐每由此

路以古為證得之者多以牧愚見不言劉稹終不能取

貴欲速擒免生他患昨者北虜纔畢復生上黨賴相公廟算深遠北虜即日敗亡倘使北虜至今尚存沿邊猶須轉戰迴顧上黨豈能討除天下雖言無事若上黨久不能解別生患難此亦非細自古皆因攻伐未解旁有他變故孫子曰兵聞拙速未睹巧之久也伏聞聖主全以兵事付於相公收受恩最深切敢干冒威嚴遠陳愚見無任戰汗

上李太尉論江賊書

伏以太尉持柄在上當軸處中未及五年一齊四海德
振法束貪廉懦立有司各敬其事在位莫匪其任雖九
官事舜十人佐周校於太尉未可為比伏以江淮賦稅
國用根本今有大患是劫江賊耳牧到任纔九月日尋
窮詢訪實知端倪夫劫賊徒上至三船兩船百人五十
人下不減三二十人始肯行劫劫殺商旅嬰孩不留所
劫商人皆得異色財物盡將南渡入山博茶蓋以異色
財物不敢貨於城市唯有茶山可以消受益以茶熟之

際四遠商人皆將錦繡繒纈金釵銀釧入山交易婦人稚子盡衣華服吏見不問人見不驚是以賊徒得異色財物亦來其間便有店肆為其囊橐得茶之後出為平人三二十人挾持兵仗凡是鎮戍例皆單弱止可供億漿茗呼召指使而已鎮戍所由皆云賒死易就死難縱賊不捉事敗抵法謂之賒死與賊相拒立見殺害謂之就死若或人少被捉罪抵止於私茶故賊云以茶壓身始能行得言隨身有茶人不疑是賊凡千萬輩盡販私茶亦有已聚

徒黨水劫不便逢遇草市泊舟津口便行陸劫白晝入市殺人取財多亦縱火唱棹徐去去年十月十九日劫池州青陽縣市凡殺六人內取一人屠割心腹仰天祭拜自邇已來頻於鄰州大有劫殺沉舟滅跡者即莫知其數凡江淮草市盡近水際富室大戶多居其間自十五年來江南江北凡名草市劫殺皆偏只有三年再劫者無有五年獲安者一劫之後州縣糜費所由尋捉烽火四出凡是平人多被恐脅求取之外恩讎並行追逮

證驗窮根尋源狼虎滿路狴牢克塞四五月後炎鬱蒸
濕一夫有疾染習多死免之則蹤跡未白殺之則賊狀
不明一獄之中凡五十人中二十人悉是此輩至於真
賊十人不得一濠毫徐泗汴宋州賊多劫江西淮南宣
潤等道許蔡申光州賊多劫荆襄鄂岳等道劫得財物
皆是博茶北歸本州貨賣循環往來終而復始更有江
南土人相為表裏校其多少十居其半蓋以倚淮介江
兵戈之地為郡守者罕得文吏村鄉聚落皆有兵仗公

然作賊十家九親江淮所由此不敢入其間所能捉獲
又是沿江架船之徒村落負擔之類臨時脅去分得涓
毫雄健聚嘯之徒盡不能獲為江湖之公害作鄉間之
大殘未有革釐實可痛恨今若令宣潤洪鄂各一百人
淮南四百人每船以三十人為率一千二百人分為四
十船擇少健者為之主將仍於本界江岸勅立營壁置
本判官專判其事揀擇精銳牢為舟棹晝夜上下分番
巡檢明立殿最必行賞罰江南北岸添置官渡百里率

一盡絕私載每一宗船上下交送

同阻風風便是桴鼓
同發名一宗

是桴鼓

之聲千里恒接私渡盡絕江中有兵安有烏合蟻聚之輩敢議攻劫或曰制置太大不暇如此答曰今西北邊禦未來之寇備向化之戎長傾東南物產供百萬口況長江五千里來往百萬人日殺不辜水滿冤骨至於嬰稚曾不肯留葛伯殺餉童子湯征滅之蓋以童子無知而殺之王者不赦其罪今長江連海群盜如麻驟雨絕絃不可尋遂無闔可閉無要可防今者自出五道兵士

不要朝廷添兵活江湖賦稅之鄉絕寇盜劫殺之本政
理之急莫過於斯若此制置凡去三害而有三利人不
冤死去一害也鄉間獲安無追逮證驗之苦去二害也
每擒一私茶賊皆稱買賣停泊恣口點染鹽鐵監院追
擾平人搜求財貨今私茶盡黜去三害也商旅通流萬
貨不乏獲一利也鄉間安堵徃行空虛獲二利也擷茶
之饒盡入公室獲三利也三害盡去三利必滋窮根尋
源在劫賊耳故江西觀察使裴誼召得賊帥陳璠署以

軍中職名委以江湖之任陳璠健勇分毫不私自後廉

察悉皆委任至今陳璠每出彭蠡湖口領徒東下商船

百數隨璠行止璠去之後惘然相弔安有清朝盛時太

尉在位反使萬里行旅依一陳璠牧詳觀格律勅條百

二十卷其間制置無不該備至於微細亦或再三唯有

江寇未嘗言及今四夷九州文化武伏奉貢走職罔不

如法言其功德皆歸太尉敢率愚衷上千明慮冀裨萬

一無任惶懼

上周相公書

牧再拜伏以大儒在位而未有不知兵者未有不能制
兵而能止暴亂者未有暴亂不止而能活生人定國家
者自生人已來可以屈指而數也今兵之下者莫若刺
伐之法詩大雅維清奏象舞之篇曰維清緝熙文王之
典迄用有成維周之禎象者象武王伐紂刺伐之法此
乃文王受命受殷王專
征之命也七年五伐留戰陣刺伐之法遺
之武王武王用以伐紂而有天下致之清平為周家之

禎祥周公居攝祀文武於清廟作此詩以歌舞文武之德其次兵之尤者莫若鈎援衝壁今之一卒之長不肯親自為之詩大雅周公皇矣美周之詩曰以爾鈎援與爾臨衝以伐崇墉臨衝閑閑崇墉言言此實文王伐崇墉傳於其城以臨車衝鈎援其城文王親自為之夫文王何人也周公詩之夫子刪而取之列於大雅以美文王之功德手絃而口歌之不知後代之人何如此三聖人安有謀人之國有暴亂橫起戎狄乘其邊坐於廟堂

之上曰我儒者也不能知兵不知儒者竟可知兵乎竟不可知兵乎長慶兵起自始至終廟堂之上指蹤非其人不可一二悉數高宗朝薛仁貴攻吐蕃大敗於大非川仁貴曰今年歲在庚午不當有事於西方此乃鍾鄧伐蜀身誅不返昨者誅討党羌徵關東兵用於西方是
不知天道也邊地無積粟師無見糧不先屯田隨日隨餉是
不知地利也兩漢伐虜騎兵取於山東所謂冀之北土馬之所生馬良而多人習騎戰非山東兵不能伐

虜昨者以步戰騎百不當一是謂不知人事也天時地利人事此三者皆不先計量短長得失故困竭天下不能滅撲檄之虜此乃不學之過也不教人戰是謂棄之則謀人之國不能料敵不曰棄國可乎牧所注孫武子十三篇雖不能上窮天時下極人事然上至周秦下至長慶寶厯之兵形勢虛實隨句解析離為三編輒敢上獻以備閱覽少希鑑悉苦心即為至幸伏增惶惕

上崔相公書

天生相公輔仁聖天子外齊武事內治文教被權衡稱
量者不失銖黍受威烈懾怛者蚓縮魚藏百職率治中
外平一伏惟相公功德無與為比往者彭城驕強頑卒
數萬聯三齊舊風振天下餉道重弓束矢大刀長矛不
受指揮自有信誓王侍中生於其間稱為健黠奔馬潛
出不敢迴顧高僕射寬厚聞名能治軍事舉動汗流拜
於堂下及闕不受李司徒嚮食其使者風波不迴氣勢
已去自淮北渡由洛東下漕輓行役出泗上者稚長相

賀藩鎮欲生事樹功者橫激芻構廟堂謀議不知所出
相公一家僮馳入萬衆無不手垂目瞪露刃絃弓偶語
腹誹或離或伍相公氣壓其驕文誘其順指示叛臣賊
子覆滅之蹤鋪陳忠臣義士榮顯之效皇威空湧於言
下狼心頓革於目前然後剔刮根節銷磨頑礦日教月
化水順雪釋吐飯飽之解衣暖之威驅恩收禮訓法束
一年人畏二年人愛三年化成截成一邦俗同三輔當
此之時遲回之間有勇力者一唱而起征兵數十萬大

小且百戰然後傳其墨鉤其垣得其罪人天下固已困矣而天下議者必曰某某名將也其善用兵也雖疏爵上公裂土千里其酬尚薄此必然之說也故曰見勝不過衆人之所知非善之善者也戰勝而天下曰善非善者也百戰百勝非善之善者也能不戰而屈人之兵乃善之善者也是相公手攜暴虎貪狼化為耕牛乘馬退數十萬兵解天下之縛祇於談笑俯仰燕享筆硯之間耳以此校之斯過古人萬萬遠矣復自持統大相開張

教化外制四夷內循百度長育人材興起頽弛心迎志
釋罔有怨嗟是以天下帖泰蝗死災去饑人復飽流人
復安內外遠近率職奉法不聞其他如周有召穆公仲
山甫漢有魏相丙吉國朝姚宋二公文事武事居中處
外罔不是倚國家有天下二百三十餘年盛溢兩漢功
侔三代今復生相公輔佐仁聖天子天時人事即自將
來福祿昌熾卜之無窮天下孰不幸甚牧僻守荒郡亦
被陶鈞齒髮甚壯志尚未衰敢不自強冀答天造無任

感激悃懇之至牧恐懼再拜

上昭義劉司徒書

今日輕重望於幾人相位將權長材厚德與輕則輕與重則重將軍豈能讓焉昔者齊盜坐父兄之舊將七十年來海北河南泰山課賦三千里料甲一百縣獨據一面橫挑天下利則伸鈍則滿鏃而不發約在子與孫血絕而已此雖使鐵偶人為六軍取不孔易况席征蔡之弊天下消耗燕蟠趙伏用齊卜我當此之時一年不能

勝則百姓半流二年不能勝則關東之國孰知其變化也將軍一心仗忠半夜興義昧旦而已齊族矣疆土籍口探出僭物重寶仰闕輦上是以趙一搖燕一呼爭來汗走一日四海廓廓然無事矣伏惟將軍之功德今誰比哉是以初守滑臺為尚書守潞為僕射乃作司空乃作司徒爰開丞相府平章天下越錄躡等驟得富貴古今之人亦以為將軍止此而已矣將軍德於國家甚信大國家復之於將軍雅亦無與為大矣今者上黨足馬

足甲馬極良甲極精後負燕前觸魏側肘趙彼三虜屠
囚天子耆老劫良民使叛銜尾交頸各蟠千里不貢不
覲私贍妻子王者在上此輩何也今者上黨馳其精良
不三四日與魏決於漳水西不五六日與趙合於泝水
東縈太原排飛狐緩不二十日與燕遇於易水南此天
下之郡國足以事區區於忠烈無如上黨者明智武健
忠寬信義知機便多算畫攻必巧戰不負能使萬人樂
死赴敵足以事區區於忠烈天下之人無如將軍者爵

號祿位富貴榮顯宜驅三族上校恩澤宜出萬死以副
倚注天下之人亦無如將軍者是將軍負天下三無如
之望也始者將軍賴齊然後得祿仕入卧内等子弟一
身聯齊累世之逆卒境上爭首其恩甚厚其勢甚不便
將軍以為大仁可以殺身大忠不顧細謹終探懷而取
之今者將軍負三無如之望上戴天子四海之大以為
緩急所宜日夜具申喧請今默而處者四五歲矣負天
下之三無如者宜如是耶不宜如是耶是以天下之小

人以為將軍始者取齊見利而動今者安潞見義而止
若是則天下利無窮義有限走無窮背有限則安可識
之哉其有識者則曰不然夫桓文之霸也先修刑政然
後事事近有山東士人來者咸道上黨之政軍士兵吏
士詳男子畝婦人桑老者養孤者庇上下一切罔有紕
事暨乎政庭則將軍不知尊布衣不知卑諸侯之驕久
矣是以高才之人不忍及門仁政不施久矣是以暴亂
不止若此者將軍是行仁政來高才苟行仁政來高才

若非止暴亂尊九廟峻中興復何汲汲如是耶在漢伯
通在晉牢之二人功力不寡一旦誅死人豈寬之符秦
相猛將終戒視後禍大唐太尉房公忍死表止伐遼此
二賢當時德業不左諸人尚死而不已蓋以輔君活人
為事非在矜伐邀引為心也伏惟將軍思伯通牢之所
以不終仰相猛房公之所以垂休則天下之人口祝將
軍之福壽目睹將軍盛德之形容手足必不敢加不肖
於將軍之草木此乃上下萬世烈丈夫口念心禱而求

者今將軍盡能有之豈可容易而棄哉大唐二百年外
叛者三十餘種大者三得其二小者亦包裹千里燕趙
魏潞齊蔡吳蜀同歡共悲手足相急陣刺死帳下死圍
悉死伏劍死斬死絞死大者三歲小或一月已至於盡
死曰忠曰義則有父子同壇兄弟繼踵論罪則曰有某
功論功則曰赦某罪伏惟十二聖主之仁一何汪汪焉
天之校惡滅逆復何切切焉此乃盡將軍所識復何云
云小人無位而謀當死罪

投知己書

夫子曰不怨天不尤人下學而上達知我者其天乎復
曰知我者春秋罪我者亦以春秋此聖人之操心不顧
世之人是非也柱厲叔事莒敖公莒敖公不知及莒敖
公有難柱厲叔死之不知我則已反以死報之蓋怨不
知之深也豫讓謂趙襄子曰知伯以國士待我我以國
士報之此乃烈士義夫有深感其知不顧其生也行無
堅明之異材無尺寸之用泛泛然求知於人知則不能

有所報不知則怒此乃衆人之心也聖賢義烈之士既不可到小生有異於衆人者審已切也審已之行審已之才皆不出於衆人亦不求知於人已或有知之者則藏縮退避唯恐知之深蓋深自度無可以為報效也或有因緣他事不得已求知於人者苟不知未嘗退有慙言怨色形於妻子之前此乃比於衆人唯審已求知也太和二年小生應進士舉當其時先進之士以小生行可與進業可益修喧而譽之爭為知己者不啻二十人

小生邇來十年江湖間時時以家事一抵京師事已即
返嘗所謂喧而譽之為知己者多已顯貴未嘗一到其
門何者自十年來行不益進業不益修中夜忖量自愧
於心欲持何說復於知己之前為進拜之資乎默默藏
縮苟免寒饑為幸耳昨李巡官至忽傳閣下旨意似知
姓名或欲異日必錄在門下閣下為世之偉人鉅德小
生一獲進謁一陪譙享則亦榮矣况欲異日終置之於
榻席之上齒於數子之列乎無攀緣絲髮之因出特達

個儻之知小生自度宜為何才可以塞閣下之求宜為
何道可以報閣下之德是以自承命已來審已愈切拊
心獨驚忽忽思之而不自知其然也若蒙待之以衆人
之地求之以衆人之才責之以衆人之報亦庶幾異日
受約束指顧於簿書之間知無不為為不及私亦或能
提筆伸紙作詠歌以發盛德止此而已其他望於古人
責以不及非小生之所堪任伏恐閣下聽聞之過求取
之異敢不特自發明導說其衷一開閣下視聽其他感

激發憤懷愧思德臨紙汗發不知所裁

上李中丞書

牧入仕十五年間凡四年在京其間卧疾乞假復居其
半嗜酒好睡其癖已痼往往閉戶便經旬日弔慶參請
多亦廢闕至於俯仰進趨隨意所在希時徇勢不能逐
人是以官途之間比之輩流亦多困躓自顧自念守道
不病獨處思省亦不自悔然分於當路必無知己默默
戚戚守日待月冀得一官以足衣食一自拜謁門館似

蒙獎飾敢以惡文連進几案特遇采錄更不因人許可
指教實為師資接遇之禮過等詢問之辭悉纖雖三千
里僻守小郡上道之日氣色濟濟不知沉困之在已不
知昇騰之在人都門帶酒笑別親戚斯乃大君子之遇
難逢世途之不偶常事雖為遠宦適足自寬牧世業儒
學自高曾至於牧身家風不墜少小孜孜至今不怠性
顛固不能通經於治亂興亡之跡財賦兵甲之事地形
之險易遠近古人之長短得失中丞即歸廊廟宰制在

手或因時事召置堂下坐之與語此時迴顧諸生必期
不辱恩獎今者志尚未泯齒髮猶壯敢希指顧一螿肝
膽無任血誠

樊川集卷九

樊川集卷十

唐杜牧撰

書

上宣州高大夫書

牧頓首再拜自去歲前五年執事者上言云科第之選
宜與寒士凡為子弟議不可進熟於上耳固於上心上
持下執堅如金石為子弟者魚潛鼠遁無入仕路牧竊

惑之科第之設聖祖神宗所以選賢才也豈計子弟與寒士也古之急於士者取盜取讎取於夷狄豈計其所由來況國家設取士之科而使子弟不得由之若以科第之徒浮華輕薄不可任以為治則國朝自房梁公已降有大功立大節率多科第人也若以子弟生於膏粱不知理道不可與美名不令得美仕則自堯已降聖人賢人率多子弟凡此數者進退取捨無所依據牧所以憤懣而不曉也堯天子子也禹公子也文王諸侯孫與

子也武王文王子也周公文王之子武王之弟也夫子

天子裔孫宋公六代大夫子也春秋時列國有其社稷

各數百年其良臣多出公族及卿大夫子孫也魯之季

友季文子叔孫穆子叔孫昭子孟獻子皆出於三桓也

臧文仲武仲出於公子彊柳下惠出於公子無駭

諸侯之子

稱公子公子之子稱公孫公孫之子稱公族以王父字為氏展禽是也

宋之良臣多出於

戴桓武莊之族也舉其尤者華元子罕向戌是也衛之

良臣亦公族及卿大夫之裔也舉其尤者公子荆公叔

發公子朝皆公族也子鮮公子也史狗史魚甯武子卿

大夫之裔也齊之晏嬰桓子子也曹之子臧公子也吳

之季札王子也鄭之良臣皆公孫公族也舉其尤者子

封子良子罕子展子皮子產子張子太叔是也楚之良

臣子囊子西子期皆王子也子庚王孫也其卿大夫之

裔關氏生令尹子文後有鬬辛鬬巢鬬懷

昭王返國皆有大功

為

氏生蒸賈孫叔敖

蒸父

遠啓彊遠子馮遠掩遠罷屈氏

生屈蕩屈到屈建

子

六國時有昭奚恤公族也屈原諸

屈後也皆其祖先於武王文王時基楚國為霸者用其子孫其社稷垂九百餘年至於晉國最為強其賢臣尤多有趙氏魏氏韓氏狐氏中行氏范氏荀氏羊舌氏欒氏邵氏祁氏其先皆武公獻公文公勤勞臣也用其子弟召諸侯而盟之者近三百年在六國齊之孟嘗趙之平原魏之信陵皆王子王孫也齊復有司馬穰苴亦王族也其在漢魏已下至於國朝公族之子弟卿大夫之胄裔書於史氏為偉人者不可勝數不可殫論聖賢才

能於子弟中復何如也言科第浮華輕薄不可任用則

國朝房梁公玄齡進士也相太宗凡二十一年為唐宗

臣比之伊呂周召者郝公處俊亦進士也為宰相時高

宗欲遜位於武后處俊曰天下者高祖太宗之天下非

陛下之有但可傳之子孫不可私以與后高宗因止來

濟上官儀李玄義皆進士也後為宰相濟助長孫太尉

褚河南共推武后者後突厥入塞免胄戰死儀草廢武

后詔玄義助處俊言不可以位與武后婁侍中師德亦

進士也吐蕃強盛為監察御史以紅抹額應猛士詔躬
衣皮袴率士屯田積穀八百萬石二十四年西征兵不
乏食薦狄公為相取中宗於房陵立為太子漢陽王張
公柬之亦進士也年八十為相毆致四王手提社稷上
還中宗郭代公元振亦進士也鎮涼州僅十五年北却
突厥西走吐蕃制地一萬里握兵三十萬武氏惕息不
敢移唐社稷魏公知古亦進士也為宰相廢太平公主
謀以佐玄宗及卒也宋開府哭之曰叔向古之遺直子

產古之遺愛兼而有者其魏公乎姚梁公元崇登第下
筆成章舉首位玄宗起中興業凡三十年天下幾無一
人之獄宋開府璟亦進士也與姚唱和致開元太平者
劉幽求登制策科與玄宗徒步誅韋氏立睿宗者蘇氏
父子皆進士也大許公為相於武后朝酷吏中不失其
正於中宗朝誅反賊鄭普思於韋后黨中小許公佐玄
宗朝號為蘇宋張燕公說登制策科排張易之兄弟贊
睿宗請玄宗監國竟誅太平公主招置文學士開內學

館玄宗好書尚古封中太山祀后土因燕公也張曲江
九齡亦進士也排李林甫牛仙客罵張守珪不斬安祿
山謫老南服年未七十張巡亦進士也凡三入判等以
兵九千守睢陽城凡週歲拒賊十三萬兵出天寶雜記使賊
不能東進尺寸以全江淮元和中宰相河東司空兼中
書令裴公皆進士也裴公仍再得宏辭制策科當貞元
時河北背叛齊蔡亦叛階此蜀亦叛吳亦叛他未叛者
皆高下其目熟視朝廷希嚮強弱而施其所為司空始

相憲宗廢權倖之機牙令不得張收歛百職歸於有司

命節度使出於朝廷不由兵士

始自撫州除袁相為滑州滑州凡三月無帥三

軍無事憲宗始信之自此不用貞元故事以行軍副使大將軍為節度使拔取沉滯各還其

官

開州取唐舍人為職方郎中知制誥饒州取李趙公為考功郎中知制誥在貞元中皆十餘年遷逐其他

謫者亦皆當叙用也

然後西取蜀東取吳天下仰首始見白日裴

公撫安魏博使田氏盡歸六州元和中翦蔡劇賊於洛

陽脅下招來常山質其二子以累其心取十三城使不

得與齊交手為寇因誅師道河南盡平當是時天下幾

至於太平凡此十九公皆國家與之存亡安危治亂者
也不知科第之選復何如也至於智效一官忠立一節
德行文學不可悉數董生云春秋之義變古則譏之傳
說命高宗曰監於先王成憲其以永無愆故殷道復興
鴻鴈美周宣王能復先王之道西漢魏相佐漢宣帝為
中興但能奉行漢家故事姚宋佐玄宗亦以務舉貞觀
之法制耳自古及今未有背本棄古而能致治者昨獲
覽三郎秀才新文凡十篇數日在手讀之不倦其旨意

所尚皆本仁義而歸忠信加以辭彩適茂皎無塵土況
有誠明長厚之譽於千人中倘使前五六年得進士第
今可以出入諫官御史助明天子為治矣古人云三月
不仕則相弔安有凡五六年來選取進士施設網罟如
防盜賊言子弟者噎啞抑鬱思一解布衣與下士齒厥
路無由於古今未前聞也牧因覽三郎文章不覺發憤
略言大槩干觸尊重無任惶悚

上池州李使君書

景業足下僕與足下齒同而道不同足下性俊達堅明
心正而氣和飾以溫慎故處世顯明無罪悔僕之所稟
潤畧疎易輕微而忽小然其天與其心知邪柔利已偷
苟讒諂可以進取知之而不能行之非不能行之抑復
見惡之不能忍一同坐與之交語故有知之者有怒之
者怒不附已者怒不怙言柔舌道其盛美者怒守直道
而違已者知之者皆齒少氣銳讀書以賢才自許但見
古人行事真當如此未得官職不覩形勢絜絜小輩之

徒也怒僕者足以裂僕之腸折僕之脛知僕者不能持一飯與僕僕之不死已幸况為刺史聚骨肉妻子衣食有餘乃大幸也敢望其他然與足下之所受性固不得伍列齊立亦抵足下疆壘畦畔間耳故足下憐僕之厚僕仰足下之多在京城間家事人事終日促束不得日出所懷以自曉自然不敢以輩流間期足下也去歲乞假自江漢間歸京乃知足下出官之由勇於為義向者僕之期足下之心果為不繆私自嘉賀足下果不負天

所付與僕所期向二者所以為喜且自賀也幸甚幸甚
夫子曰吾少也賤故多能鄙事復曰不試故藝聖人尚
以少賤不試乃能多能有藝况他人哉僕與足下年未
三十為諸侯幕府吏未四十為天子廷臣不為甚賤不
為不試矣今者齒各甚壯為刺史各得小郡俱處僻左
幸天下無事人安穀熟無兵期軍須逋負靜訴之勤足
以為學自強日勉於未聞未見之間僕不足道雖能為
學亦無所益如足下之才之時真可惜也向者所謂俊

達堅明心正而氣和飾以溫慎此才可惜也年四十為
刺史得僻左小郡有衣食無為吏之苦此時之可惜也
僕以為天資足下有異日名聲跡業光於前後正在今
日可不勉之僕常念百代之下未必為不幸何者以其
書具而事多也今之言者必曰使聖人微旨不傳乃鄭
玄輩為注疏之罪僕觀其所解釋明白完具雖聖人復
生必挈置數子坐於游夏之位若使玄輩解釋不足為
師安得聖人復生如周公夫子親授微旨然後為學是

則聖人不生終不為學假使聖人復生即亦隨而汨之矣此則不學之徒好出大言欺亂常人耳自漢以降其有國者成敗廢興事業蹤跡一二億萬青黃白黑據實空有皆可圖畫考其來由裁其短長十得四五足以應當時之務矣不似古人窮天鑿玄躡於無蹤莫於忽微然後能為學也故曰生百代之下未必為不幸也夫子曰三人行必有我師焉此乃隨所見聞能不亡失而思念至也楚王問萍實對曰吾往年聞童謠而知之此乃

以童子為師耳參之於上古復酌於見聞乃能為聖人
也諸葛孔明曰諸公讀書乃欲為博士耳此蓋滯於所
見不知適變名為腐儒亦學者之一病僕自元和以來
以至今日其所見聞名公才人之所論討典型制度征
伐叛亂考其當時參於前古能不忘失而思念亦可以
為一家事業矣但隨見隨忘隨聞隨廢輕目重耳之過
此亦學者之一病也如足下天與之性萬與僕相遠僕
自知頑滯不能苦心為學假使能學之亦不能出而施

之懇懇欲成足下之美異日冀受足下之教於一官一
局而無過失而已自古未有不學而能垂名於後代者
足下勉之大江之南夏侯鬱濕易生百疾足下氣俊胸
臆間不以惰忿是非貯之邪氣不能侵慎防是晚多食
大醉繼飲其他無所道

上宣州崔大夫書

牧再拜閣下以德行文韋有位於明時如望江漢見其
沈汪瀟漫不知其所為終始也復自開幕府已來辟取

當時之名士禮接待遇各盡其意後進絜絜以節業自持者無不願受閣下回首一顧舒氣快意自己滿足今藩鎮之貴土地兵甲生殺與奪在一出口終日矜高與門下後進之士權得失去就於分寸銖黍間多是其人也獨閣下不自矜高不設壑壘曲垂情意以盡待士之禮然後知後進絜絜以節義自持者願受閣下回首一顧舒氣快意自己滿足此固然也非敢佞其辭以取媚也不知閣下俯仰延遇之去就幣帛筐篚之多少飲食獻

酬之和樂各用何道閑夜永日三五相聚危言峻論知
與不知莫不願盡心於閣下壽考福祿祝之無窮牧雖
不肖則亦千百間其一人數也鹿鳴宴群臣詩曰既飲
食之復實幣帛筐篚以將其厚意然後忠臣嘉賓得盡
其心矣吉日詩曰宣王能慎微接下無不盡心以奉其
上焉自古雖尊為天子未有不用此而能得多士盡心
也未有不得多士之盡心而得樹功立業流於歌詩也
況於諸侯哉夫子曰君子疾沒世而名不稱司馬遷曰

自古富貴其名磨滅不可勝紀兩言思之令人感動激

發當寐而寤在饑而飽伏希閣下濬之益深築之益高

緘鏞之益固使天下之人異日捧閣下之德不替今日

則為宰相長育人材興起教化國朝房杜姚宋不足過

也牧於流輩無所知識承風望光徒有輸心效節之志

今謹錄雜詩一卷獻上非敢用此求知蓋欲導其志無

以為先也往年應進士舉曾投獻筆語亦蒙亟稱於時

今十五年矣於頑懵中為之不已久於其事能不稍工

不敢再錄新述恐煩尊重無任惶懼

與人論諫書

牧疎愚怠惰不識機括獨好讀書讀之多矣每見君臣
治亂之間興亡諫諍之道遐想其人舐筆和墨則冀人
君一悟而至於治平不悟則烹身滅族唯此二者不思
中道自秦漢以來凡千百輩不可悉數然怒諫而激亂
生禍者累累皆是納諫而悔過行道者不能百一何者
皆以辭語迂險指射醜惡致使然也夫迂險之言近於

誕妄指射醜惡足以激怒夫以妄誕之說激怒之辭以卑凌尊以下干上是以諫殺人者殺人愈多諫畋獵者畋獵愈甚諫治宮室者宮室愈崇諫任小人者小人愈寵觀其旨意且欲與諫者一鬪是非一決怒氣耳不論其他是以每於本事之上尤增飾之今有兩人道未相信甲謂乙曰汝好食某物慎勿食果食之必死乙必曰我食之久矣汝謂我死必倍食之甲若謂乙曰汝好食某物第一少食苟多食必生病乙必因而謝之減食何

者迂險之言則欲反之循常之說則必信之此乃常人之情世多然也是以因諫而生亂者累累皆是也漢成帝欲御樓船過渭水御史大夫薛廣德諫曰宜從橋陛下不聽臣自刎以血污車輪陛下不廟矣上不說張猛曰臣聞主聖臣直乘船危就橋安聖主不乘危御史大夫言可聽上曰曉人不當如是耶乃從橋近者寶曆中敬宗皇帝欲幸驪山時諫者至多上意不決拾遺張權輿伏紫宸殿下叩頭諫曰昔周幽王幸驪山為犬戎所

殺秦始皇焚驪山國亡玄宗皇帝宮驪山而祿山亂先

皇帝幸驪山而享年不長帝曰驪山若此之凶耶我宜

一往以驗彼言後數日自驪山面語親倖曰叩頭者之

言安足信哉漢文帝亦謂張釋之曰卑之無甚高論令

可行也今人平居無事友朋骨肉切磋規誨之間尚宜

勿引曲釋疊疊繹繹使人樂去其不善而樂行其善况

於君臣尊卑之間欲因激切之言而望道行事治者乎

故禮稱五諫而直諫為下前數月見報上披閣下諫疏

錫以弊帛僻左且遠莫知其故近於遊客處一睹閣下
諫草明白辯婉出入有據吾君聖明宜為動心數日在
手味之不足且抃且喜且慰三者交并不能自止吾君
聞諫既且行之仍復寵錫誘能諫者斯乃堯舜禹湯文
武之心也聞於遠地宜為吾君抃也閣下以忠孝文章
立於朝廷勇於諫而且深於其道果能輔吾君而光世
德牧蒙閣下之厚愛莫於異時資閣下之知以進尺寸
能不為閣下之喜復自喜也吾君今日披一疏而行之

明日聞一言而用之賢才忠良之士森列朝廷是以奮
起志慮各盡所懷則文祖武宗之業窮天盡地日出月
入皆可掃洒以復厥初牧縱不得效用但於一官一局
筐篋簿書之間活妻子而老身命焉作為歌詩稱道仁
聖天子之所為治則為有餘能不自慰故獲閣下之一
疏抃喜慰三者交并真不虛也無因而讚其事書紙言
誠不覺繁多

與浙西盧大夫書

牧再拜牧年二十六由校書郎入沈公幕府自應舉得
官凡半歲間既非生知復未涉人事齒少意銳舉止動
作一無所據至於報效施展朋友與遊吏事取捨之道
未知東西南北宜所趨向此時郎中六官一顧憐之手
携指畫一一誘教叮嚀纖悉兩府六年不嫌不忌使牧
無大過而粗知所以為守者實由郎中之力也去歲乞
假路由漢上員外七官以牧嘗獲知於郎中惠然不疑
推置於肺肝間牧恃郎中之知亦敢自道其志公私謀

議各悉所懷一俯一仰如久而深者久欲資郎中員外
之為階級遠干尊重欲望收卹舐筆伸紙以復踰於三
四因曰既階級矣步欲升堂與排闥而入者事不同日
式微詩曰何其處也必有與也言必有仁義與我所以
處而不去也進退計忖不宜得罪今敢謹寫所為文十
四首編為一卷繼進於後愛之不倦為之不已必至於
工今以為獻無任慙惶然特為進說之端非敢因此求
知不勝攀戀

答莊克書

牧白足下凡為文以意為主氣為輔以辭彩章句為之
兵衛未有主強盛而輔不飄逸者兵衛不華赫而莊整
者四者高下圓折步驟隨主所指如鳥隨鳳魚隨龍師
衆隨湯武騰天潛泉橫裂天下無不如意苟意不先立
止以文彩辭句繞前捧後是言愈多而理愈亂如入闖
關紛紛然莫知其誰暮散而已是以意全勝者辭愈樸
而文愈高意不勝者辭愈華而文愈鄙是意能遣辭辭

不能成意大抵為文之旨如此觀足下所為文百餘篇
實先意氣而後辭句慕古而尚仁義者苟為之不已資
以學問則古作者不為難到今以牧無可取欲命以為
序承當厚意惕息不安復觀自古序其文者皆後世宗
師其人而為之詩書春秋左氏以降百家之說皆是也
古者其身不遇於世寄志於言求言遇於後世也自兩
漢已來富貴者千百自今觀之聲勢光明孰若馬遷相
如賈誼劉向揚雄之徒斯人也豈求知於當世哉故親

見揚子雲著書欲取覆醬瓿雄當其時亦未嘗自有誇
目况今與足下並生今世欲序足下未已之文此固不
可也苟有志古人不難到勉之而已

上河陽李尚書書

伏以三城所治兵精地要北鎖太行東塞黎陽左京河
南指為重輕自艱難已來儒生成名立功者蓋寡於前
代是以壯健不學之徒不知儒術不識大體取其微效
終敗大事不可一二悉數伏以尚書有才名德望知經

義儒術加以儉克好立功名今橫據要津重兵在手朝廷縉紳之士屈指延頸佇觀政能况聖主掀擢豪俊考校古今退朝之後急於觀書已築七閩取隴城緝為郡縣今親誅虜收其土田取其良馬為耕戰之具西復涼州東取河朔平一天下不使不貢不覲之徒敢自專擅此實聖主之心事業已彰臣下明明無不知之伏自尚書樹立鍛鍊教訓揀拔法術尺寸取於古人若受指顧必立大功使天下後學之徒知成功立事非大儒知今

古成敗者不能為之復使儒生舒展胸臆得以誨導壯
健不學之徒指蹤而使之令其心服正在今日牧多病
早衰志在耕釣得一二郡資其退休以活骨肉亦能作
為歌詩以稱道盛德其餘息心亦已久矣下情日增瞻
戀

上鹽鐵裴侍郎書

伏以鹽鐵重務根本在於江淮今諸監院頗不得人皆
以權勢干求固難悉議停替其於利病豈無中策牧自

池州睦州實見其弊蓋以江淮自廢留後已來凡有冤人無處告訴每州皆有土豪百姓情願把鹽每年納利名曰土鹽商如此之流兩稅之外州縣不敢差役自罷江淮留後已來破散將盡以監院多是誅求一年之中追呼無已至有身行不在則拘其父母妻兒得錢即放不二年內盡恐逃亡今譬於常州百姓有屈身在蘇州歸家未得便可以蘇州下狀論理披訴至如睦州百姓食臨平監鹽其土鹽商被臨平監追呼求取直是睦州

刺史亦與作主不得非裹四千里糧直入城役使即須
破散奔走更無他圖其間搜求胥徒針抽縷取千計百
校唯恐不多除非吞聲別無赴訴今有明長吏在上苟
縣百里尚敢公為不法况諸監院皆是以貨得之恣為
姦欺人無語路况土鹽商皆是州縣大戶言之實可痛
心比初停罷留後衆皆以為除煩去冗不知其弊及於
疲羸即是所利者至微所害者至大今若蒙侍郎改革
前非於南省郎吏中擇一清慎依前使為江淮留後減

其胥吏不必一如向前多置人數即自嶺南至於汴宋
凡有冤人有可控告姦賊之輩動而有畏數十州土鹽
商免至破滅除江淮之太殘為侍郎之陰德以牧愚見
莫過於斯若問於鹽鐵吏即不欲江淮別有留後若有
留後其間百事自能申狀諮呈安得貨財表裏計會分
其權力言之可知伏惟俯察愚衷不賜罪責

與汴州從事書

汴州境內其弊最苦是牽船夫大寒虐暑窮人奔走斃

路不少牧數年前赴官入京至襄邑縣見縣令李式甚
年少有吏才條疏牽夫甚有道理云某當縣萬戶已來
都置一板簿每年輪檢自差若有使來先行文帖刻期
令至不揀貧富職掌一切均同計一年之中一縣人戶
不著兩度夫役如有遠戶不能來者即任納錢與於近
河雇夫對面分付價值不令所由欺隱一縣之內稍似
蘇息蓋以承前但有使來即出帖差夫所由得帖富豪
者終年間坐貧下者終日牽船今即自以板簿在手輪

轉差遣雖有點吏不能用情牧每任刺史應是役夫及竹木瓦磚工巧之類並自置板簿若要使役即自檢自差不下文帖付縣若下縣後縣令付案案司出帖分付里正一鄉只要兩夫事在一鄉徧着赤帖懷中藏却巡門掠斂一徧貧者即被差來若籍在手中巡次差遣不由里胥典正無因更能用情以此知襄邑李式之能以惠及夫役更有良術即不敢知以牧愚見且可救急因襄邑李生之績效知先輩思報幕府之深誠不覺亦

及拙政以為證明豈敢自述今為治患於差役不平詩
云或栖遲偃仰或王事鞅掌此蓋不平之故長吏不置
簿籍一一自檢即姦胥貪冒求取此最為甚

樊川集卷十

謹案卷八第四頁前八行段頴刊本頴訛頴據後
漢書改

卷九第六頁前五行伐後燕慕容暉刊本暉訛倬
據晉書改下同

卷十第二頁後五行子庚王孫也按子庚公子午
也莊王子此誤

第二頁後七行為艾獵刊本艾獵訛文犯據左傳
改

第十一頁後八行為之不已久于其事刊本已久訛知矣據文苑英華改

第十三頁前二行漢成帝欲御樓船按御樓船乃元帝非成帝也此誤

第十五頁後四行式微詩曰何其處也必有與也按此二語見詩旄丘篇此誤

高
林
陳
書
卷
之
一

總校官庶吉士臣張能照

校對官庶吉士臣戴心亨

膳錄監生臣瞿秉虔

欽定四庫全書薈要

集部

樊川集卷十二

詳校官助教臣常循



樊川集卷十一

唐 杜牧 撰

賀平党項表

臣奉三月二十七日勅党項剪除北邊寧靜華夏同慶
道路懽呼臣牧誠慶忭頓首頓首伏以上天有震耀
殺戮王者有攻討誅夷是以不暫討者不久寧不一勞



者不永逸伏以自古夷狄處中華未有不為患者春秋時長狄攻魯北戎病齊破衛陵燕侵秦撓晉西漢趙克國納先零於內地東朝馬文泉置當煎於三輔自後熾大侵亂關中戰爭十年騷擾四海陵逼京邑發掘困陵段熲不生終不能滅後至曹公因匈奴衰弱分為五部處在汾晉散而居之元海傑然首亂華夏中原喪沒凡數百年國朝貞觀之初突厥破滅太宗感彥博之利口忽文貞之成莫處其降衆置於河南不數十年果殘燕

趙興師命將輸穀饋財天下騷然始能殄滅是知今古
夷狄處在中土未有不為亂者伏以党羗雜種本在河
外生西北之勁俗稟天地之戾氣為西戎所蹙舉種來
降國家納之置於內地爰受冠帶兼伏征徭角觫既成
觶觸是務天寶至德之際北燕偏重中原一掀大厯建
中之際逆胡餘波巨盜再起党羗因此亦恣猖狂兔伏
鳥飛為戎虜之耳目狼心梟髻作郊畿之殘賊比以回
鶻未殄吐蕃正強且須羈縻未可重振於是邊疆日駭

種類歲繁每至勁弓折膠童馬免乳以魁健之質張忿
驚之兇劫饋穀以焚舟殺輅車而閉道衆虺盤結羣犬
叫牙依據深山出沒險徑近在宇下游於穀中艱難已
來不能剗削伏惟聖敬文思和武光孝皇帝皇天縱聖
赫日資明威極風霆謀先造化潛運睿算獨決神機其
宿禡牙狼星歛角戊日禱馬太白揚耆按鎖而邊事無
遺聚米而兵形盡見披其要地擣以奇兵獸窮搏人鹿
急走險囊封赤白雜沓繼來雉走檄書遠近同至蘇辛

李蔡傳鄭甘陳十萬齊呼四面同入行軍於枕席之上
敗虜於險阻之中或以利戈搯喉或以長矛挾脅僵屍
積疊千山之草木飛腥霆雷轟喧萬里之威靈大震詩
曰不弔昊天亂靡有定此言中國不振蠻夷入伐下人
號天以告亂也復曰宣王薄伐小雅中興是知武功不
成文德不洽臯陶無遺之誠史佚非類之言若不殄除
何為家國自此兵為農器革作軒車泥紫金於常山沉
殘戎於青海天覆盡得禹畫無遺統華夏為一家用夷

狄為四守萬物由道百度皆貞遠超三代之風使無一人之虐臣僻左小郡樸樾散材空過流年徒生聖代尚能為詩見志作歌極情上詠神功庶垂後代限以守土不獲稱慶無任踴躍欵懇之至

賀生擒衡州草賊鄧裴表

臣等伏見湖南團練使奏生擒衡州草賊鄧裴及徒黨等伏以湖湘旱耗百姓饑荒遂有姦兇敢圖嘯聚今承擒滅已盡根株臣等誠懼誠忤頓首頓首臣聞三代之

英兩漢之盛姦宄亂常之類提災構逆之黨乘間即有
遇隙便生伏惟聖敬文思和武光孝皇帝陛下威極風
霆德滋雨露正開壽域盡納羣生永戢干戈將臻富庶
逆賊鄧裴鯁爾小孽敢因艱食漸誘饑人剝亂鄉閭陵
驚郡邑徒堅黨合事鉅寇牢或據深山或閉官道遂使
湖嶺之外人不聊生慎由指揮義徒總齊武士仰憑睿
算遠仗皇威不經歲時盡剪豺虺党項已寧於朔北妖
黨復殄於巴西今擒鄧裴一清湖嶺用夷狄為四守統

華夏為一家言念秋毫無非帝力臣等備位台鼎日捧
聖謨無任忭舞踴躍之至

進撰故江西韋大夫遺愛碑文表

右臣奉某月日勅牒令撰故江西觀察使韋丹遺愛碑
文臣官卑人微素無文學恩生望外事出非常承命震
驚以榮為懼伏以洪為州府逾於千年言念疲羸常患
水火風俗如此改革無因韋丹受朝廷分憂為百姓去
弊不踐舊跡特建宏謀凡三年苦心去千歲大患兼之

灌溉種蒔豐其衣食渤海潁川之治邵父杜母之恩校之于丹未足為比伏惟皇帝陛下陟降順帝施設如神納諫若轉丸去惡如反掌是以兵刑措寢年穀豐登而猶念切疲人及於循吏緬韋丹已效之績慰江西去思之心特與彰揚創為碑紀是宜使內直學士西掖詞臣振發雄文流傳後代至于臣者最為鄙陋明命忽臨牢讓無路俯仰慙懼神魂驚飛臣不敢深引古文廣徵樸學但首叙元和中興得人之盛次述韋丹在任為治之

功事必直書辭無華飾所冀通衢一建百姓皆觀事事
彰明人人曉會但率誠樸不近文章受曲被之恩私如
生羽翼報非次之拔擢宜裂肝腸無任感激懇悃血誠
之至其碑文本謹隨狀封進以聞

黃州刺史謝上表

臣奉某月日勅旨授臣黃州刺史以某月日到任上訖
誠惶誠恐頓首頓首臣牧自出身已來任職使府雖有
官業不親治人及登朝二任皆參臺閣優游無事止奉

朝謁今者蒙恩擢授刺史專斷刑罰施行詔條政之善
惡唯臣所係素不更練兼之昧愚一自到任憂惕不勝
動作舉止唯恐罪悔伏以黃州在大江之側雲夢澤南
古有夷風今盡華俗戶不滿二萬稅錢三萬貫風俗謹
朴法令明具久無水旱疾疫人業不耗謹奉貢賦不為
罪惡臣雖不肖亦能守之然臣觀東漢光武明帝稱為
明主相繼聯續五十年當時以深刻刺舉號為稱職治古
之風廢俗吏之課高於此時循吏衛旼任延王景魯恭

劉寬陳寵之徒止一縣宰獨能不徇時俗自行教化唯德是務愛人如子廢鞭笞責削之文用忠恕撫字之道百里之內勃生古風凡違眾背時徇古非今王者公侯尚難其事豈一縣宰能移其俗此蓋人為治古之人法為一時之法以治古之教教之即治古之人以一時之法齊之即一時之人國家自有天下已來二百三十餘年間專用仁恕每後刑罰是以前難外難作者相繼土地甲兵權柄號令盡非我有終能擒之此實恩澤慈愛

入人骨髓俗厚風古不可搖動今自陛下即位已來重
罪不殺小過不問普天之下蠻貊之邦有罹艱凶一皆
存卹聖明睿哲廣大慈恕遠僻隱阨無不懽戴十四聖
之生育張二百四十年之基宇臣於此際為吏長之敢
不遵行國風彰揚至化小大之獄必以情恕孤獨鰥寡
必躬問撫庶使一州之人知上有仁聖天子所遣刺史
不為虛受烝其和風感其歡心庶為瑞為祥為歌為詠
以裨盛業流乎無窮在臣心之則然豈材術之能及無

任感激悃懇之至

謝賜御札提舉邊將表

伏奉宸翰以邊塞未靜將帥乏才唯務誅求不謀兵食者伏以陛下自即位以來正朝廷而舉典法肥天下而壽羣生故能不血刃以收河湟用文誥而降羌寇干戈偃戢遠邇安寧今者尚以戍邊未得高枕深憂將帥不副憂勤或但恣於侵貪或不事其兵食須有戒勵形於詔書此乃周文小心克勤大禹不自滿假比於聖德無

以過馬臣等備位鼎司親奉睿旨銘鏤肝膈專令防虞
無任抃躍屏營之至

謝賜新絲表

右中使某至奉宣聖旨賜臣等新絲者伏以繭蠶所繫
在於纂組其功之大與食爭先陛下仁德動天雨澤順
序柔柔沃若蠶女功勤翦比凝霜縈如委霧繭稅不逋
於鄉井被覆皆徧於華夷盡荷皇慈同歌帝力臣等備
位台席親逢盛時無任歡抃感恩之至

為中書門下請追尊號表

伏以收復河湟廓開土宇北絕梓嶺西過榆溪壯中夏
起塞之雄奪西戎理弓之地至使強虜不敢觸鋒山鎖
七關地闢千里歌狸首而息射詠杖杜以勞旋聖德神
功超今越古某月日臣等於延英殿面奉德音陛下以
克定舊疆獲成先志歸功祖考追尊鴻名臣等伏念國
家之為治也溢三皇之軌躅奮百代之上下天寶之末
天下泰寧恃富庶而醉飽無虞韜干戈而兇逆僭作大

歷貞元之際河北河南之地朝廷行姑息之政郡國皆
叛亂之臣苟且之令行畫一之法廢月增日長雄唱雌
和李錡宗子劉闢書生東據石頭西斷劍閣朝廷所有
唯止兩京伏惟憲宗皇帝順上帝之心酌列聖之法爵
不踰德舉不失賢親端莊之正人去側媚之邪士然後
提挈綱紀震疊雷霆誅夷羣兇灑掃四海百度如律九
功可歌天業益張聖統無極詩曰惠我無疆子孫保之
復曰周雖舊邦其命維新伏惟元和之初實開中興之

業伏惟聖敬文思和武光孝皇帝陛下脩先王之大道

行天下之達德廣問延諫褒直盡下首雪冤獄常對法

官是則虞舜恤刑文王慎罰無以過也開張聰明延納

諫諍守職業者無職不舉被言責者無事不言皆獲甄

陞豈唯假借夫仲尼以三人有我師大禹以愚夫能勝

予是仲尼之好問大禹之拜言無以過也是以百姓手

足皆安於措置四海風俗益臻於和平尚猶子夜觀書

日昃聽政下採人病上求天瑞帝典曰聖敬日躋湯銘

曰日日新是陛下之德有以方之仲尼曰禹立三年百姓以仁仰陛下之至理知孔聖之可驗夫西戎強盛自古無之包有引弓之人盡臣跨馬之國天下獻力備邊不克四海輸賦養兵不足廣川薦草盡為所有健兵倅馬不可當鋒雖李廣才能克國沈勇但能閉壘豈敢交綏伏惟聖敬文思和武光孝皇帝陛下畜睿莫於霄漢之表畫聖謨於造化之先捕虜將軍射聲校尉羽林突陣之騎酒泉校尉之兵親自指蹤同時受命信星效祉

靈旗呈祥壁壘言言而洞開渠魁累累而自縛解辦削
衽投戈委弓懾怛威靈歡呼冠帶破種徙域空漠靜邊
指北海而封燕然中西域而立幕府鄭吉之理烏壘班
超之鎮他乾大庇生人一寬天下昔漢武帝之逐北虜
四海耗半殷高宗之伐鬼方三年乃克尚書班史稱德
詠功今陛下用仁義為干戈以恩信為疆場所求必至
有鬪必先不遺一矢不煩一刀洗八聖肝食之恨雪百
年亡地之羞小雅盡興大業無極為而不有歸功先帝

禮曰天子有善上讓于天仲尼曰武王周公其達孝乎
蓋以善於繼述能光祖考今者陛下謙讓之道符於禮
經繼述之孝稱於孔聖臣等待罪宰相目覩昇平謹具
太常追尊順宗皇帝憲宗皇帝謚號如前伏候勅旨

代裴相公讓平章事表

臣伏奉今日制書除臣同中書門下平章事祇奉成
命進退失圖捧詔兢惶銜恩戰慄臣誠惶誠恐頓首頓
首臣本書生仕逢聖代掌綸言於西掖作藩守於名邦

自顧才能己是踰越陛下獎遇不次拔擢過分春闈典
貢地官掌財咸無政能粗免僭闕及擢為筦擢累受寵
榮雖竭盡疲篤欲裨萬一而才智疎拙不效涓塵夫宰
相之任前賢有言如涉川有舟如幽室有燭代天理物
為人具瞻豈伊小臣而膺大任今朝廷髦俊並集名德
森然或多歷庶官或皆有功實或四方屏翰己著勲勞
舉而用之無不可者如臣凡淺豈宜委任伏乞俯回天
鑑更擇時賢必能丹青帝圖金玉王度使微臣無尸祿

之謂聖主有得賢之名非唯微臣獲安實亦天下幸甚
無任悃懇血誠之至

代謝賜批荅表

臣伏奉今日批荅令臣宜斷來表不許牢讓者仰承
鴻澤跪捧芝緘戰越失圖啟處無地臣誠惶誠恐頓首
頓首臣昨奉詔書付以魁柄自顧斗筭之器樸樾之才
乘恩寵時竊棟梁任只合效蔡謨堅卧孔霸懇辭尚猶
拜謝天顏進見卿士榮忝既積憂惶實深是以拜章上

陳懇辭自叙冀回聖鑑更擇時賢豈意睿旨重臨綸音
再下不令徇志且遣守官大君之成命已行微臣之丹
懇不遂誓當戮力盡瘁粉骨捐軀知無不為見死寧避
冀答君親生成之德用酌乾坤覆育之恩無任感激慙
惶之至

狀

代謝賜告身鞍馬狀

右中使某奉宣聖旨賜臣告身一通馬一疋并鞍轡臣

生逢聖代竊位巖廊奉告令之詔書丹青之雨露猶濕
錫代勞之駿馬內棧之風雲尚隨寶軸煥絲綸之言逸
足騁權竒之態螢光燭火何裨日月之明弱質孤根但
荷乾坤之德殺身寧報撫已知慙無任感恩抃躍之至
壽昌節宴謝賜音樂狀

右臣某言伏以降誕之辰生靈同慶合鈞天之廣樂九
奏諧和令錫宴於仙祠百辟歡抃臣等幸生聖代獲備
台階雖欲殺身豈酌大造無任感恩踴躍之至

代論閣內延英奏對書時政記狀

右舊例宰臣每於閣內及延英奏論政事及退歸中書知印宰臣盡書其日德音及宰臣奏事送付史館名時政記史官憑此編入簡策伏以敷陳時政承奉聖旨事非一端時移數刻退朝循省執筆讚論但記出己之辭或忘同列之對若獻替之說或闕則史冊之書不詳臣今商量每閣內奏事及延英對回陛下所降德音宰臣所奏公事人自為記共成一篇既得精詳必無遺漏付

與史氏使得直書伏乞天恩永為常式

宴畢殿前謝狀

臣等言遲日正麗廣場洞開張仙樂者三千餘人列正
羞者二十六豆酒傾瑤壺食置雕盤列圭組以成行酌
金罍以為勞屬饜而止飽德以歸既醉太平之風共樂
仁壽之域千年一遇百辟同歡臣等備位台司親逢聖
日歡呼抃躍不能自勝

謝許受江西送綵絹等狀

右今月十八日中使某至奉宣聖旨令臣領江西觀察使紇干衆所寄撰韋丹遺愛碑文人事綵絹三百疋者恩隨幸至榮與利并抃躍慙惶罔知所措伏惟皇帝陛下皇天縱聖赫日資明大獎功勞不計存沒舉韋丹江西之績特令微臣撰碑墮淚之思豈慙羊祜黃絹之妙實愧蔡邕今者更蒙恩私廣受絲帛捧戴兢惕無地容身不勝感恩慚惶之至

謝賜物狀

臣等言叨陪錫宴竊覩鈞天百品並陳三酒皆具微臣
所志已極滿盈豈意鴻澤重霑錫賚殊等朱綠玄黃之
繒綵精金文錦之珍竒捧戴自天啟處無地不勝抃躍
感恩之至

謝賜茶酒狀

右臣某等言伏以大慶吉辰榮霑錫宴鴻恩繼至玉人
荐臨旨酒名茶玉食仙果來于御府莫匪天慈適口忘
憂已滿小人之腹殺身粉骨難酬聖主之恩無任感恩

抃躍之至

代人舉周敬復自代狀

前件官執德以進嚮道而行藹有令名備歷清貫掌綸
言於西掖才稱發揮參密命於內庭衆推忠慎自珥貂
近侍主鑰東門聲寔益重於縉紳磨涅始彰其堅白伏
以南省實天下根本兩丞為百司管轄苟非其選必致
敗官今若以臣所任迴授敬復庶能肅清臺閣提舉紀
綱既曰陟明實不虛受伏乞天恩允臣所請

代人舉蔣係狀

伏准某年月日勅内外文武官宜舉一人自代者伏以
前件官仁義素彰文學早著揚歷臺閣宣昭令名嘗為
諫官無所避忌及領藩鎮實惠疲羸頃者不附權臣例
遭左官今逢明代猶典小州伏以封還詔書駁正時事
職業實重選擇宜精今若以臣此官迴與蔣係既不虛
受實為陟明伏乞聖慈允臣所請

上淮南李相公狀

伏以近日當州人吏往來及諸道賓客行過皆傳相公
以淮海之地災旱累年仁憫之心憂念深切廣求人瘼
大革土風卹養疲羸抑挫豪猾備職者思勵其己業官
者得用其能鰥寡孤獨飛沈動植仁煦必及惠愛無遺
吏不敢欺法能必束上行下效家至戶封閭里安泰吏
冊未聞竊以聖上倚注既深相公勲業愈重况茲異政
即達宸聰伏料窮邊絕塞將議息兵宣室明庭必思舊
德重秉鈞軸固在旬時牧豎跡門牆不勝抃躍攀望祭

戟下情無任戀結之至

上鄭相公狀

伏以相公自專魁柄一闡大猷鎮撫四夷訓導百吏無不信順皆有程品猶尚不遺微賤特降慰誨重疊滿幅榮耀闔門捧戴生光啟處無地聞於白屋之輩皆願殺身詢於黃耆之徒以為異事慰示天下長育人材魚頡鴻冥之潛丘中島上之隱皆可以結戀隨指效用盡心接地際天日出月入盡得臣妾無不謳歌蒼生颺颺實

有所望牧一門骨肉皆受恩知效命之誠瀝血自誓無
任攀戀感激懇悃之至

上安州崔相公狀

牧比於流輩一不及人至於讀書為文日夜不倦凡諸
所為亦未有以過人至於會昌三年八月中所獻相公
長啟鋪陳功業稱較短長措於史記兩漢之間讀於文
士才人之口與二子並無愧容伏恐機務殷繁不暇省
覽今者竊敢再錄啟本重干尊嚴付于史官而不誣懸

於後代而不泯其於取重豈在小人復敢別錄所為新
舊文兩卷凡一十九首上陳視聽一希鑄琢重疊過越
惶懼伏深伏惟照察

上吏部高尚書狀

牧人惟樸檄材實朽下三守僻左七換星霜拘攀莫伸
抑鬱誰訴每遇時移節換家遠身孤弔影自傷向隅獨
泣將欲漁釣一壑栖遲一丘無易仕之田園有仰食之
骨肉當道每歎末路難循進退唯艱憤悱無告今者大

君繼統賢相秉鈞遺墜必舉髦雋並作伏惟尚書秩高
天爵德冠人倫為搢紳之紀綱作朝廷之標表凡遊門
館莫非雋賢至於小人最為凡器頃者幸以屬郡祇事
廉車奉約束而雖嚴滌昏蒙而無術實多僭闕每賴恩
容敢望尊嚴特自袞舉手示遠降羈魂震驚感激彷徨
涕淚迸落便無跛倚如生羽翰全忘鼠循忽欲鳥舉雖
闕下一召歲中四遷校其光榮不能踰越禮曰君子愛
其死有以待也養其身有以為也是小人忘生殺身之

地剗腸奉首之報今得之矣復何求焉江山絕域登臨
已秋猿吟鳥思草衰木墜黎侯寓衛有式微之詩趙王
遷房創山木之詠流落多戚今古同塵迴望門牆涕戀
唯積起居末由無任血誠懇悃之至

上刑部崔尚書狀

牧比於流輩踈濶慵怠不知趨嚮唯好讀書多忘為文
格卑十年為幕府吏每促束於簿書宴遊間刺史七年
病弟孀妹百口之家經營衣食復有一州賦訟私以貧

苦焦慮公以愚恐敗悔仍有嗜酒多睡廁於其間是數者相遭於多忘格卑之中書不得日讀文不得專心百不逮人所尚業復不能尺寸銖兩自強自進乃庸人輩也復何言哉今者欲求為費於大君子門下尚可以為文而為其禮詩所謂有覲面目視人罔極者也謹敢繕寫所為文凡二十首伏地汗赧不知所云

樊川集卷十一

樊川集卷十二

唐杜牧撰

啟

上李太尉論北邊事啟

牧啟伏以聖主垂衣太尉當軸威德上顯和澤下流諸
侯無異心百姓無怨氣星辰順靜日月光明天業益昌
聖統無極既功成而理定實道尊而名垂今則未聞縱

東山之遊樂後園之醉惕惕若不足兢兢而如無豈不以邊障尚警殊虜未殄防其入寇猶煩徵兵伏以回鶻種落人數非多校於突厥絕為小弱今者國破衆叛近來漠南為羈旅之魂食草萊之實白鬣驪駢之騎凋耗已無漣酪皮毳之資饑寒皆盡寄命雜種藏跡陰山取之及時可以一戰今者度虜之計不出二者時去時來徊翔不決必有所在西戎已得要約伺其氣勢同為侵擾此其一也心膽破壞馬畜殘少且於美水豐草暖日

廣川牧馬養習以俟強大此其二也今者徵中國之兵與之首尾久戍則有師老費財之憂深入則有大寒瘡墮之苦示戎狄之弱生姦傑之心今者不取恐貽後患敢以管見上干尊重自兩漢伐虜皆是秋冬不過百日驅中國之人入苦寒之地此時匈奴勁弓折膠童馬免乳畜肥草壯力全氣盛與之相較勝少敗多故匈奴云漢實大國也但其人不能辛苦爾此所謂避虛而擊實逃短而攻長至於後魏崔浩因見其理蠕蠕強盛屢犯

北邊浩請討之曰蠕蠕恃其地遠自寬來久故夏則散
衆放畜秋肥乃聚背寒向暄南來寇抄今出其慮表掩
其不備大兵卒至必驚駭星分向塵奔走牡馬護牧牝
馬戀駒驅馳難制不得水草未過數日則聚而困斃可
一舉而滅矣武帝從之及軍入境蠕蠕先不設備民畜
布野驚怖四奔莫相收捕於是分軍撲討東西五千里
南北三千里凡所俘虜及獲畜產彌漫山澤高車因殺
蠕蠕種類歸降者三十餘萬落虜遂散亂帝沿弱水西

行至涿邪山諸大將慮深入有伏兵勸帝停止不追浩
先勸窮追之不從後聞涼州賈胡言若更前行三日則
盡滅之矣帝深恨之以牧所見今若以幽并突陣之騎
酒泉教射之兵整飭誠誓仲夏潛發計陰山與涿邪之
遠近十不一二校蠕蠕回鶻之強弱猶如虎鼠五月節
氣在中夏則熱到陰山尚寒中國之兵足以施展行軍
於枕席之上翫寇於掌股之中軌輻懸瓶湯沃暎雪一
舉無類必然之策令冰合防秋冰銷解戍行之已久虜

為長然出其意外實為上策議者或云北取黠戛今討
回鶻伏以黠戛起於別種超為可汗必是英傑天時必
助賢材必用法令必明滅回鶻之後便是勅敵況示之
以弱必為所輕今者四海九州同風共貫諸侯用命年
穀豐熟可以瘞玄玉於常山子遺人於河壘顧茲疲虜
豈遺子孫伏惟太尉相公大德素昭武功復著畫地而
兵形盡見按鎖而邊事無遺唯一指蹤即可掃跡昔漢
武帝之求賢也有上書不足採者輒報罷去未嘗罪之

故能羈越臣胡大興禮樂今太尉與仁聖天子同德有志之士無不願死伏惟特寬狂狷不賜誅責生死榮幸無任感恩惶悚

賀中書門下平澤潞啟

牧啟伏以上黨之地肘京洛而履蒲津倚太原而跨河朔戰國時張儀以為天下之脊建中日田悅名曰腹中之眼帶甲十萬籍土五州太行夷儀為其扃關健馬強弓為其羽翼自逆黨專有僅及一世頗聞教育實曰精

強昨者凶豎專地之請初陳聖主整旅之詔將下中外
遠邇皆疑難攻蜂蟻蟾螂頗亦自負伏惟相公上符神
斷潛運廟謨仗宗社威靈驅風雲雷電掌上必取殷中
難逃纒逾周星果梟逆首周公東征之役捷至三年憲
皇淮夷之師克聞四歲校虜寇之強弱曾不等倫考攻
取之敗亡何至容易若非睿莫英畧借筋深謀比之前
脩一何遠出自此鞭笞反側灑掃河湟大開明堂再振
儒校窮天盡地皆為壽域之人赤子秀眉共老止戈之

代牧謬分符竹實由恩知慶快懼忤倍百常品不宣

上白相公啟

牧啟伏惟相公上佐聖主獨專魁柄封植良善修整紀
綱練羣臣謹百職考功績覈名實大張公室盡閉私門
盛德大功直筆實光於簡策清節細行祝史不愧於神
明天下望之為準繩朝廷倚之為依據畢公克勤小物
周公煥發大猷丙吉陋案吏於公庭袁安不錮人於聖
代衛將軍有長揖之客張子孺無謝恩之人吉甫率由

舊章魏相能明故事房杜不以求備取人不以己長格
物姚梁公先有司脩舊法下位各得言其志百司各得
盡其才求於古人之賢皆集相公之德如以尺量刀解
粉布墨畫小大銖黍九角尖缺各盡其分皆當其任是
以庶人不議鄉校無言天下欣欣若更生者自此黃髮
之老待哺之子不見兵戈不離抱撫清廟之祭四夷來
助蒼生之願百志皆成顛顛萬方實懸斯望牧遠守僻
左無因起居但採風謠亦能歌詠無任攀戀激切

上周相公啟

牧啟伏奉三月八日勅除尚書司勳員外郎史館修撰承命榮懼啟處無地伏以聖主順上帝之則率四海以仁神化風行家至日見古先哲王之德也有求必至有開必先是以傅呂得於夢卜申甫降於山嶽伏惟相公待主乃用為時而生當考室構厦之時膺篤繩削墨之任贊傑俊遂賢良調陰陽提紀律類能而使度材受官常切如家之憂每懷捷市之恥是以朝廷禮樂天下清

明人不凋傷神不怨疾萬物由道百度皆貞雖周獲仁
人商得元哲夢卜降嶽之得豈能逾焉牧樸橄之才糞
朽之賤遭逢盛業三帶郡符自審事宜實以逾忝伏以
睦州治所在萬山之中終日昏氛侵染衰病自量忝官
己過不敢率然請告唯念滿歲得保生還不意相公拔
自污泥昇於霄漢却收斥錮令廁班行仍授名曹帖以
重職當受震駭神魂飛揚撫己自驚喜過成泣藥肉白
骨香返遊魂言於重恩無以過此雖買臣懷紘郡邸蕭

育召拜扶風楊僕三組垂腰蘇秦六印在手校於榮忝
無以為喻言念微生難酌殊造伏以相公自數載以來
朝廷篤老四海俊賢皆因挈維盡在門館毘輔聖主巍
為元勳自有明神以相百祿固唯賤末報效無門感激
血誠涕淚迸溢無任懇欵

薦韓乂啟

昨日所啟言韓拾遺事非與韓求衣食救饑寒也御史
亦豈為救饑寒之官乎中丞必曰大梁奏取韓以饑寒

何不去夫幕吏乃古之陪臣以人馬北面雖布衣無恥之士亦宜訪其樂與不樂况有道之君子乎韓以旅寓洛中非不樂梁也不甘不告之請耳韓及第後歸越中佐沈公江西宣城府罷唐扶中丞辟於閩中罷府歸路由建州妻與元晦同高祖扶惡晦為人不省之及晦得越乃棄產避之居常州殷儼者仰韓之道自閩寄百緡遺之及門不開書緡而斥去之牧比兩府同院但見其廉慎高潔亦未知其道太和八年自淮南有事至越見

韓君於境上三畝宅兩頃田樹蔬釣魚唯召名僧為侶
餘力究易嬉嬉然無日不自得也未嘗及身名出處之
語未嘗入公府造請與幕吏宴遊因此不為縉紳所見
禮蕭高二連帥即日造其廬詢以政事稱先人梓材有
文學高名沒於越之府幕故不願復為越賓及高至許
下厚禮辟之其為人也貞潔芳茂非其人不與遊非其
食不敢食蕭舍人考功崔員外是趨於韓交者某復趨
於蕭崔二君子者即韓之去某其間不啻容數十人矣

亦安得知其賢而言之復不借乎伏恐中丞謂韓求官以衣食干交朋者中丞初在憲府固宜慎選御史御史固非救饑寒之官牧久承恩知但欲薦賢於盛時雖至淺陋亦知不可以交友饑寒求清秩以干大君子者伏慮未審誠懇故此具陳本末伏惟照察

薦王寧啟

前渭南縣令王寧實有吏才稱於衆口年少強力一也遇事必能裁割二也既蘊智能無頭角誇誕三也廉直

可保四也處於驕將內臣之間必能和同五也今者邊
將生事雜虜起戎不憂兵甲唯在饋運牧過承恩獎輒
敢薦才伏惟取舍之間特賜恕察

上知己文章啟

牧啟牧少小好為文章伏以侍郎文師也是敢謹貢七
篇以為視聽之污伏以元和功德凡人盡當歌詠紀叙
之故作燕將錄往年弔伐之道未甚得所故作罪言自
艱難以來卒伍傭役輩多據兵為天子諸侯故作原十

六衛諸侯或恃功不識古道以至於反側叛亂故作與
劉司徒書處士之名即古之巢由伊呂輩近者往往自
名之故作送薛處士序寶厯大起宮室廣聲色故作阿
房宮賦有廬終南山下嘗有耕田著書志故作望故園
賦雖未能深窺古人得與揖讓笑言亦或的的分其狀
貌矣貞元四年來在大君子門下恭承指顧約束於政
理簿書間永不執卷上都有舊第唯書萬卷終南山下
有舊廬頗有水樹當以耒耜筆硯歸其間及齒髮尚壯

冀有成立他日捧持一遊門下為拜謁之先或希一獎
今者所獻但有輕黷尊嚴之罪亦何所取伏乞少假誅
責生死幸甚

獻詩啟

牧啟牧苦心為詩本求高絕不務奇麗不涉習俗不今
不古處於中間既無其才徒有其意篇成在紙多自焚
之今謹錄一百五十篇編為一軸封留獻上握風捕影
鑄木鏤冰敢求恩知但希鐫琢冒黷尊重無任惶悚

上宰相求湖州第一啟

牧啟人有愛牧者言於牧曰吏部員外郎例不為郡子不可求假使已求慎勿堅懇至於再三答曰牧雖不學按六典令式及諸故事多無此例國史復無賢相名卿懸之以為格言此乃急於進趨之徒自為其說若以言例貞元初故相國盧公邁由吏部員外郎出為滁州近者澶王傅李凝為鹽鐵使江淮留後豈曰無例人曰盧事太遠李為擢用此不足徵牧曰不知今者視之古事

在書取為今證遠自三代兩漢近至隋氏國初尚可援
引况前十五年名相故事反不足為例乎况盧公邁止
以骨肉寒餓來守滁陽非如牧以親弟廢痼寒餓仍之
是盧公有一牧有二與盧公所切復為不同仲尼曰雍
也可使南面今刺史古之南面諸侯行天子教化刑罰
者江淮鹽鐵留後求利小臣校量輕重與刺史相懸求
利臣乃可吏部員外郎為之十萬戶州天下根本之地
曰吏部員外郎不可為其刺史即是本末輕重顛倒乖

戾莫過於此牧弟顓世胄子孫二十六一舉進士及第
嘗為上裴相公書道杜溫潤詞理傑逸賈生司馬遷能
為之非班固劉向輩疊疊之詞流於後輩人皆藏之朱
崖李太尉迫以世舊取為浙西團練使巡官李太尉貴
驕多過凡有毫髮顓必疏而言之後謫袁州於愴惶中
言於親吏曹居實曰如杜巡官愛我之言若門下人盡
能出之吾無今日李太尉在袁州顓客居淮南牛公欲
辟為吏顓謝曰苟爽為李膺御以此顯名今受命為幕

府下執事御李膺矣然李公困謫遠地未願仕宦牛公
嘆美之聰明雋傑非尋常人也牧自省事已來未聞有
後進名士喪明廢棄窮居海上如顛比者今有一兄仰
以為命復不得一郡以飽其衣食盡其醫藥非今日海
內無也言於所傳聞亦未有也自古言喜莫若虢國太
子以其死而復生言懇莫若申包胥求救於秦七日七
夜哭聲不絕救今懇如包胥但未哭耳若蒙恩憫特遂
血懇其喜也不下虢太子詞語煩碎頻干尊重足及軒

聞神驚汗流不勝憂恐懇悃

第二啟

牧啟牧幼孤貧安仁舊第置於開元末有屋三十間而
已去元和末酬償息錢為他人有因此移去八年中凡
十徙其居奴婢寒餓衰老者死少壯者當面逃去不能
呵制止有一豎戀戀憫嘆挈百卷書隨而養之奔走困
苦無所容歸死於延福私廟支柱欹壞而處之長兄以
驢遊丐於親舊牧與弟顛食野蒿藿寒無夜燭默所記

者凡三週歲遭遇知己各及第得官文宗皇帝改號初
年牧為御史分察東都顓為鎮海軍幕府吏至二年間
顓病眼暗無所覩故殿中侍御史韋楚老曰同州有眼
醫石公集劍南少尹姜沔喪明親見石生針之不一刻
而愈其神醫也牧迎石生至洛告滿百日與石生俱東
下見病弟於揚州禪智寺石曰是狀也腦積毒熱脂融
流下蓋塞瞳子名曰內障法以針旁入白睛穴上斜撥
去之如蠟塞管蠟去管明然今未可也後一週歲脂當

老硬如白玉色始可攻之某世攻此疾皇祖及父某所
愈者不下二百人此不足憂其年秋末牧載病弟與石
生自揚州南渡入宣州幕至三年冬牧除補闕石生自
曰明年春眼可針矣視瞳子中脂色玉白果符初言堂
兄慥守潯陽溯流不遠刺史之力復可以飽石生所欲
令其盡心此即家也京中無一畝田豈可同歸遂如潯
陽四年二月牧於潯陽北渡赴官與弟顓決手哭曰我
家世德汝復無罪斯疾也豈遂痼乎然有石生慎無自

撓其年四月石生施針九月再施針俱不效五年冬牧
為膳部員外郎乞假往潯陽取顓西歸顓固曰歸不可
議俟兄慥所之而隨之會昌元年四月兄慥自江守蘄
牧與顓同舟至蘄牧其年七月却歸京師明年七一作正

月出守黃州在京時詣今虢州庾使君問庾使君眼狀
庾云同州有二眼醫石公集是一也復有周師達者即
石之姑子所得當同周老石少有術甚妙似石不及某
常病內障愈於周手豈少老間工拙有異牧至黃州以

重幣卑詞致周至，斬周見弟，眼曰：嗟乎！眼有赤脈，凡內障脂凝，有赤脈綴之者，針撥不能去，赤脈赤脈不除，針不可施，除赤脈必有良藥。某未知之，是石生業淺不達此理，妄再施針，周不針而去。時西川相國兄始鎮揚州，弟兄謀曰：揚州大郡為天下通衢，世稱異人，術士多遊其間，今去，值有勢力，可為久安之計，冀有所遇。其年秋，顓遂東下，因家揚州，與顓一相見，別八年矣。坐一室中，不復有再生意，住三十日而西。臨歧，與決曰：此行也必。

祈大郡東來謀汝醫藥衣食庶幾如志近聞九嶷山南
有隱士蔡母弘者人言異人能愈異疾忠州鄆都縣有
仙都觀後漢時仙人陰長生於此白日昇天今聞道士
龔法義年逾八十精嚴其法人之所謂有前世負累今
世還以痼疾者奏章於上帝能為解之刺史之力二人
或可致是以去歲閏十一月十四日輒獻長啟乞守錢
塘蓋以私懇有素非敢率然言念病弟喪明坐廢十五
年矣但能識牧聲音不復知牧鬣已半白顏面衰改是

牧今生可以見顛而顛不能復見牧矣此天也無可柰
何牧能見顛而不得去此豈天乎而懸在相公若小人
微懇終不能上動相公相公恩憫終不下及小人是日
月下親兄弟終無相見期况去歲淮南小旱衣食益困
目無所覩復困於衣食即海內言窮苦人無如顛者今
敢以情事再書懇迫上干尊重伏料仁旨必為憫惻然
牧早衰多病今春耳聾積四十日四月復落一牙耳聾
牙落兼年如七八十人將謝之候也今未五十而有七

八十人將謝之候蓋人生受氣堅強脆弱品第各異也
堅強者七八十而衰脆弱者四五十而衰其不同也亦
與草木中蒲柳松柏同也牧今生四十八矣自今年來
非唯耳聾牙落兼以意氣錯寞在羣衆懽笑之中常如
登高四望但見莽蒼大野荒墟廢壘悵望寂默不能自
解此無他也氣衰而志散真老人態也自省人事已來
見親舊交遊年未五十尚壯健而死者衆矣况牧早衰
敢望六七十而後死乎願未死前一見病弟異人術士

求其所未求以甘其心厚其衣食之地牧若先死使病
弟無所不足死而有知不恨死早湖州三歲可遂此心
伏惟仁憫念病弟望牧東來之心察牧欲見病弟之志
一加哀憐特遂血懇披剔肝膽重此告訴當盛夏時敢
以私事及政事堂啟干丞相治其罪可也伏紙流涕俯
俟嚴命不勝激切

第三啟

牧啟牧去歲閏十一月十四日輒書微懇列在長啟干

黷尊重乞守錢塘以便家事自嘆精誠不能上動相公
不遂所請伏以病弟孀妹因緣事故寓居淮南京中無
業今者不復西歸遂於淮南客矣病孤之家假使旁有
強近救接庇借歲供衣月供食日問其所欠闕尚猶戚
戚多感無樂生意况乎為客於大藩喧囂雜沓之中無
俸祿之氣勢食不繼月用不給日閉門於荒僻之地取
容於里胥遊徼之輩部曲臧獲可以氣凌鼠侵又不能
制止所可仰以為命者在三千里外一郎吏耳復有衣

食生生之所須悉多欠闕欲其安活而無歎吒悲恨不可得也去歲伏蒙恩念出於私曲語今青州鄭常侍云更與一官必任東去牧承受仁旨不敢不重以錢塘更陳視聽今自勲曹遷擢在牧更授一官已榮過矣在相公必任東去之言鏘然在耳近者累得書告以羈旅困乏聞於他人可為酸鼻况於牧心豈易排遣今年七月湖州月滿敢輒重書血誠再干尊重伏希憐憫特賜比擬牧伏念骨肉悲昏早衰多病常不敢以壽考自期今

更得錢三百萬資弟妹衣食之地假使身死死亦不恨
湖州三考可遂此心湖州名郡也私誠難遂也不遇知
己豈得遂志瀝血披肝伏紙迸淚伏惟殊造或賜濟活
無任懇悃

上宰相求杭州啟

牧啟牧於京中唯安仁舊第三十間支屋而已長兄慥
罷三原縣令閒居京城弟顛一舉進士及第有文章時
名不幸得痼疾坐廢十三年矣今與李氏孀妹寓居淮

南並仰牧微官以為糶命牧前任刺史七年給弟妹衣食有餘兼及長兄亦救不足是牧一身作刺史一家骨肉四處安活自去年八月時蒙獎擢授以名曹郎官吏氏重職七年棄逐再復官榮歸還故里重見親戚言於鄙誠已滿素志自去年十二月至京以舊第無屋與長兄異居今秋已來弟妹頻以寒餒來告某一院家累亦四十口狗為朱馬縕作由袍其於妻兒固宜窮餓是作刺史則一家骨肉四處皆泰為京官則一家骨肉四處

皆因謀於知友曰杭州大郡今月滿可求欲干告吾相
次活家命以為如何皆曰子七年三郡今始歸復相國
知子必欲次第叙用子今復求刺史得不生相國疑怪
乎牧答曰是何言與牧唯恃吾相之知始敢干求今天
下以江淮為國命杭州戶十萬稅錢五十萬刺史之重
可以殺生而有厚祿朝廷多用名曹正郎有名望而老
於為政者為之牧今官為外郎是官位未至也前三任
刺史無異政聞於吾相是為政無取也今若得遂所求

非唯超顯兼活私家牧若不恃吾相之知而求之是狂
躁妄庸人也墜井者求出執熱者願濯古人以此二者
譬喻所切也牧今所切是墜於絕壑而衣掛於樹杪覆
在鼎中下有熱火而水將沸與古所喻則復過之輒敢
具疏血誠上干尊重冀垂恩憐或賜援拯悽悽丹懇不
勝惶懼懇悃

為堂兄慥求澧州啟

牧啟庫部家兄昨者特蒙獎拔却忝班行實以聽聞稍


難不敢更求榮進今在郢州汨口草市絕俸已是累年
孤外甥女及姪女堪嫁者三人仰食待衣者不啻百口
脫粟蒿藿纔及一食伏蒙仁恩頻賜顧問必許援拯授
以涪陽活於闔門無不感涕伏以相公上佐聖主蔚為
元勳恩隨風翔德與氣游唯一物之微四海之大鎔造
所及罔不得宜伏念庫部家兄承一顧之恩二紀不替
伏恐機務繁重不時記憶心迫情切輒敢重干尊嚴戰
汗憂惶伏地待罪不勝惶悚

樊川集卷十二

謹案卷十一第九頁後八行帝典曰聖敬日躋按
此出商頌長發篇非帝典語

第十三頁前三行逸足騁權奇之態刊本權訛拳
據漢書改





總校官庶吉士臣張能照

校對官庶吉士臣戴心亨

謄錄監生臣瞿秉虔